

الدموع الناطقة الجزء الثاني

في رثاء النبي (صلى الله عليه وآله وسلم) وآله (عليهم السلام)

الشاعر جابر الكاظمي

مقدمة

- قلما يظفر المتأمل في سجل التاريخ بحادثة كحادثة الطف وقضية كقضية أبي الأحرار الإمام الحسين بن علي بن أبي طالب (عليهم السلام) (في إثارتها للوجدان الجماهيري وتحريمها للعاطفة الإنسانية بصورة مستمرة وبنفس الزخم الذي زلزلت به ساحة الأحداث في المقطع الذي وقعت فيه تلك الملمحة الخالدة التي تراءت للناس أسطورة في ما عرضته من مشاهد وسطوته من معاني وخلفته من آثار.

ولئن كان للسماء دورها الرئيس في التخطيط لهذه القضية والتبليغ لها والعمل على إبقائها حية وهاجة مهما تقدم بها السن، فإنها لقاعدتها التي تبنتها وتعهدت بالنضال في سبيلها هدفاً وفكراً ومنهجاً ورصيдаً وعملاً، ودوراً لا يغفل في إدامتها وترسيخها في الألباب والقلوب، إنها ظاهرة تناغم أخذ بين هذه القضية التي توقد بحرارتها النفوس فتطفق تعبر عما يجول فيها من رؤى ومشاعر وبين هذه النفوس التي جندت لأداء وظيفتها إزاء هذه القضية كالزيت يحترق بالنار فيمؤنحاً لتبقى شعلتها ملتهبة وملهبة ما دام له وجود.

ويبرز الشعر من بين فعاليات هذه القاعدة بما له من قوة في صياغة الفكر وقدرة في التعبير عنها وفعل في التحريك لها ليحتل مساحة مرموقة ويملاً فراغاً لا يملأ بغيره من ألوان التصوير والتعبير.

وهكذا كان للقضية منذ البداية وعلى طول الخط جيش من الشعراء رفعوا راية الدم وعلقوا أوسمة الطف وبرزوا بعد ما تشبعت بأبعاد كربلاء أذهانهم وجاشت بالمأساة نفوسهم ليصوروا في قصائدهم ما نخلوه من معين قضية كان العطش معلماً من معالم المظلومية والمأساة فيها، فكان لتلك القصائد الأثر الكبير في الدفاع عن قضية كربلاء وفي إحيائها وفي تعظيمها.

ومن هنا كان تأكيد الأئمة (صلوات الله عليهم) على هذا الحقل ودعمهم للدور الرسالي الذي يمكن أن يقوم به، فهذا . على سبيل المثال . أبو هارون المكفوف يقول: قال لي أبو عبد الله (عليه السلام): (يا أبا هارون أنشدني في الحسين (عليه السلام) فأنشدته فقال: أنشدني كما تنشدون . يعني بالزقة . قال فأنشدته:

أمر على جدث الحسين فقل لأعظمه الزكية

قال: فبكى ثم قال زدني فنشدته القصيدة الأخرى قال: فبكى، فسمعت بكاءً من خلف الستر فلما فرغت قال: يا أبا هارون من أنشد في الحسين شعراً فبكى وأبكى عشرة كتبت لهم الجنة، ومن أنشد في الحسين شعراً فبكى وأبكى خمسة كتبت لهم الجنة، ومن أنشد في الحسين شعراً فبكى وأبكى واحداً كتبت لهما الجنة، ومن ذكر الحسين عنده فخرج من عينه من الدمع مقدار جناح ذبابة كان ثوابه على الله ولم يرض له بدون الجنة).

ويروي الكميّ بن زيد فيقول: دخلت على أبي جعفر (عليه السلام) فقال: والله يا كميّ لو كان عندنا مال لأعطيناك منه ولكن لك ما قال رسول الله (صلّى الله عليه وآله) (الحسان: لا يزال معك روح القدس ما ذبيت عنا).

ويطالعنا الإمام الرضا (صلوات الله وسلامه عليه) فيما ورد عنه في مقام تحليل شعراء أهل البيت (عليهم السلام) بقوله: (ما قال مؤمن فينا شعراً يمدحنا به إلا بنى الله تعالى له مدينة في الجنة أوسع من الدنيا سبع مرات يزوره فيها كل ملك مقرب وكل نبي مرسل).

نعم إنها رسالة الشعر حين ينطق ليحرك الناس في خط الحق وليساهم في دحر الباطل وليؤدي دوره في مسيرة خلافة الله تعالى في أرضه.

و(الدموع الناطقة) حلقة من هذه الحلقات المتواصلة ذرفها شاعر موهوب من شعراء أهل البيت (عليهم السلام) وأنجبه الكاظمية المقدسة وهو الشاعر جابر الكاظمي، ويمثل الدموع الناطقة ديوانه الشعري الذي يتميز به من إبداع في التصوير وجمال في التعبير وإخلاص في العمل ورسالية في الطرح وجلال في المادة قد ملأ فراغاً كان لابد أن يسد تراثنا الأدبي الشعبي، الأمر الذي يبعث على أن نشد على يديه ونحبي جهوده ونكرم أعماله وندعو الله تعالى له بالقبول والتسديد.

في قصائد الكعدة

قم يا أبي

زينب يا علي اتصوّب قلبها
گوم استمع ونّتها وعتبها
خل تشكّيلك آلام خانت بيها الايام
گوم استمع ونّتها وعتبها

* * *

يا علي زينب گبالك وكفت واحنت ظلّعتها
والدمع من جمر يجري وغاب الينشّف دمعها
وانت يا أبا الحسن تدري مصابك لزينب فجّعها
هالليله ظلت حايره دمك ومدمعها جره
هاي العقيله الصابره اشلون يتغيّر وضعها
شوف الدهر لو خانت ايامه
يعيّن بالگلب رمية سهامه
صوّب زينب سهام خانت بيها الايام
گوم استمع ونّتها وعتبها

* * *

يا علي گلب العقيله اتگطّع بمهما وصبرها
خانت الايام بيها وغدر وياها دهرها
ومثل طيرة ابن ملجم هالدهر عگبک طبرها
سيف ابن ملجم من طبر هامتك يا فارس مضر
صاب العقيله بالاثّر ومثل أمرك صار امرها
انت اتوسّدت فوگ الترايب
وهيّه موسّده بارض المصايب
من عگبک يضرغام خانت بيها الايام
گوم استمع ونّتها وعتبها

* * *

يا علي ابعين العقيله اتفايضن دمك ودمها

فوك لوعة فكد جدها وفوك محنة فكد امها
النوب فاجئها دهرها ابفكدك وزيد المها
والاشد من هاي المحن من شافتك يا ابا الحسن
منحجب بثياب الجفن هذا الفجعها وهظمها
شيصير الكلب يا داحي الباب
لو من صخر چان اتفسر وذاب
حگه الجفن مينام خانت بيها الايام
گوم استمع ونّتها وعتبها

* * *

يا علي زينب تحوم وحايه عليها المصبيه
وصاحت بصوت المعاتب لا تخليني غريبه
الدار لو فكدت الغالي بعد هالغالي شيجيبه
والوالي منهو يعوضه لو فارگ الدار ومضه
فراگك صعب يالمرتضه وليلة مصابك رهيبه
خابن يا علي ضنك وضنها
واستافه الدهر منك ومنها
اشلون الجرح يلتام خانت بيها الايام
گوم استمع ونّتها وعتبها

* * *

يا علي بهاي المصبيه يعجز لساني يوصف
زينب بدارك وسمعت صوت جبرائيل يهتف
انهدمت اركان الديانه والدمع بالعين يذرف
وزينب تحن بالفاجعه وبهاخطب متصدعه
اتعنّت لشخصك مسرعه شافتك عالموت مشرف
لمن سمعت الهاتف ينادي
ذكرت لوعة الزهره والهادي
وحاطت بيها الأحلام خانت بيها الايام
گوم استمع ونّتها وعتبها

* * *

والاشد من هالمصايب يا علي مرّت عليها
بكربلا ويا ريت حاضر شخصك وينظر شبيها
لا اهل لا والي عدها وانچتل بالطف وليها
ما تدري يا عقد الوله
زينب غريبه بكربله
ومتحيره بمالعايله

* * *

بكربلا زينب غريبه والخيم بالنار تسعر
وابو اليمه اعلى الترايب جسمه متوذّر يحيدر
وعالخيم گوم آل اميه هجمت وسلبت الخدّر
يا حيدر وهذا الجره
بحال الحرم المخدّره
وبالغريه ظلت حايره
وفوگ هاي المحن كلها مشت للكوفه يسيره

* * *

طهران / ١٩٨٢

طريق الشهادة

ظعن الاحرار بالمجد سار

من المدينه لكربلا

يسطع انوار بالمجد سار

* * *

طلع من ارض المدينه لكربلا ظعن أبو اليمه

وياه انصاره وبنينه واهل بيته فروع عصمه

والظعن يمشي بجلاله وبالمجد عين القمه

راي أبو السجاد انطوه بالظعن يمشي لنيوه

وسلمه لعباس اللوه قائد وموصوف عزمه

صاحب الجود مركز الزود

واتكفل بنات النبي

من الديار بالمجد سار

* * *

عالظعن فوگ المحامل حايه كلوب الهواشم

وراية العباس بيها ضربت استار الفواطم

وزينب ابهودج النور مطوگه ابيض الصوارم

شموس الكفاله ساطعه وزينب ابعقه مبرگه

ليله ويه الأكبر طالعه ورملة متكفلها جاسم

وتزهي الخدور بهودج النور

وحسين ظل اعلى الظعن

شاح انظار بالمجد سار

* * *

حسين شاهد هالظعينه وياها روح القدس تسري

وسمع اصوات الشهاده بجنة الفردوس تغري

جمع انصاره وبنينه وصاح الكم أكشف امري

صوت أبو اليمه مرتفع وللخطبه هاشم تسمتع

صاح ادري جسمي ينصرع وتسحك الخياله صدري
وگوم الاندال تسبي العيال
وظعن اليتامه باليسر
بين الاشرار بالمجد سار
* * *

حسين من تمّ خطبته وبالورع وضّح الفكره
لّنه يسمع صوت عالي يمثّل انصاره والعتره
صاحوا احنه وياك نمضي وحتماً نتّم الثوره
انصاره صاحوا يا شهيم إمضي بمسيرك لا تهم
انصارك بحرب وسلم وبالدمه لدينك ننصره
احنه ماشين لنصرة الدين
اوّجهنه للطف بالظعن
نحيي الافكار بالمجد سار
* * *

حسين من شاهد صحبته وياه للتضحية اتعاهد
وشاف اهل بيت النبوه عازمين براي واحد
صاح هذا اليوم يوم البيه اظهار العقايد
هاليوم يوم التضحيه هاليوم نيل الامنيه
ندحر جيوش الطاغيه ونهدم عروش المفاسد
بالوفه نسير وندري شيصير
دمنه يسجل هالنصر
بحكم الاقدار بالمجد سار
* * *

وصلت ظعون الرساله ودخلت ارض الغاضريه
والگمر نصّب خيامه ووگف بحدود الثنيه
صقّت انصار أبو اليمه وگابلت گوم آل اميه
حالة العسكر تنوصف سبعين ضد سبعين الف
وآل الرسول بهالوصف شاهره سيوف المنيه

بالابه تروح تفتدي الروح

قائدها سبط المصطفه

بجيش الابرار بالمجد سار

* * *

دخلوا بوسط المعاره وضحو الارواح بيها

شاف أبو اليمه انصاره بالرمال مجفنيها

وشاف اهل بيت النبوه بفيض دمها مغسليها

واعلى النهر راعي العلم

والنار تسعر بالخيم

وانصاب أبو اليمه بسهم

سهم المثلث بگلب حسين وگلوب الفواطم

* * *

طهران / ١٩٨١ م

المواعظ

الدهر معروفه صفاته والبشر كلمن وذاته
هالقواعد بالشرع موجوده واليخالفهن عليه مردوده
والبشر كلمن وذاته

* * *

كل بشر تنكشف ذاته وضامره بساعة الشده
هاي مدروسه المعاني كل شخص من عُبر حده
يصير رد الفعل تالي وينكلب هالامر ضده
شاهد الناس بكل عهد كلمن بفاكرته اجتهد
واليتبع درب الرشد دومه متفوق برشده
اتبع هاي النصيحة بالك لسرك تبيحه
والنصايح جوهره ومعقوده واليخالفهن عليه مردوده
والبشر كلمن وذاته

* * *

صوغ من العزه حليه وبجواهرها تحله
كبل لا دهر ك يطوك جيدك بطوك المذله
وانصحك جدّام شامت للدمع بالك تحله
يفرح من تحمل الدمع وما يصلح وياك ابوضع
لو تعلق العشره شمع ما يرد سيفه اليسله
تقلد بجوهر صفاتك تنجح بسيرة حياتك
والصفات الساميه محموده واليخالفهن عليه مردوده
والبشر كلمن وذاته

* * *

لو ردت تبكّه بحياتك مطمئن بلا مشاكل
اجتنب شخص اليخون ولا تعاشر شخص جاهل
والجهل مثل السراب واليتبعه يعود فاشل
عاشر حلیم وتعرفه صاحب شهامه ومعرفه

وميميل عن درب الوفه لذروة الايمان واصل
هالشخص لو ما تحصله اتخذ سيرة العزله
الجهل بافكارك تفصم قيوده واليخالفهن عليه مردوده
والبشر كلمن وذاته

* * *

الدهر من يرفع كيائك بالك بهالرفعه تغتر
كل شخص لو صعد ربّوه اشما صعد بالعين يزغر
ولمن اعلى الكاع تهوّ يصير حالك مثل جعفر
بالدهر هارون امثله غدار مبني اعلى الجهل
واليصعد متونه فشل من على متنه أيتكّور
اقسط بميزان فكرك كبل لا دهر ك يغدر
البشر بافكاره يقدم شهوده واليخالفهن عليه مردوده
والبشر كلمن وذاته

* * *

لو شفت غرگان حال وراذك تعينه لنجاته
وانت تتمكن تنقذه وتقدر تردله حياته
ساعده ولا تطغه بامرك الطاعي فرعون بصفاته
من هالالاوصاف اخذ الحذر لو كابللك موسى وظهر
ويغرگك بموج البحر بحكمته وآية عصاته
اجتنب فرعون ودروسه كبل ميجهلك موسى
هالمعاني بمصحفك معدوده واليخالفهن عليه مردوده
والبشر كلمن وذاته

* * *

لو شفت نمرود عصرك بالحق تلتهب ناره
صبرك اخذه من الخليل وبالصبر مثل ادواره
تشوفه برد وسلم يصبح هالذهب باول اشاره
إبراهيم بالباري ابتهل وگباله نمروده انخل
بالمرسال اضربلك مثل ادرس اهدافه وشعاره

هالنبي ما خلف عهده وسلم من ساعة الشدّه
واليعاهد لا يخون عهوده واليخالفهن عليه مردوده
والبشر كلمن وذاته

* * *

الدهر لو صافح يمينك لا تصافحها ليمينه
ملطّخه بدم التفايض من أبو اليمه وبنينه
اذكر مصاب الجواد الغدرته اعداء دينه
من اجل دينه وسنته واحياء منهج شيعته
اتخذت بالسم چبدته وروه الدين بماي عينه
چبدته بالاسم كطبعه لاجل احياء الشريعه
بذل لإحياء السنن مجهوده واليخالفهن عليه مردوده
والبشر كلمن وذاته

* * *

كلي ذايب بالنوايب والصدر مشحون بالهم
على مصيبة أبو الهادي هل يدمع العين من دم
طاحت اركان العقيدة وسورها العالي تهدم
تاسع اليمه بهالوضع بالشمس جسمه منصرع
حسين الاصل هوّ الفرع والفرع معدور بالسم
بالغدر كطّعوا چبدته مثل ما غدروا بجده
هالمواقف واضحه ومشهوده واليخالفهن عليه مردوده
والبشر كلمن وذاته

* * *

يا اهل بيت النبوه عليكم الايام جارت
بحكمة الباري لاجلكم بالسمة الافلاك دارت
لچن يا وسفه المصايب عاجواد بجفها شارت
بالاحقاد چتلوا شباب اليمه
بذاك الحال يا ريت هاشم بمّه
وايشيعوه وبسرعه تدفن جسمه

ظل ثلث تيام جسمه فوگ سطح الدار مرمي

* * *

دمشق ١٩٨٠ م

يوم الكفاح

الحرب فرصه وما نخليها تفوت
وما نعوفك لو الف موته نموت
إحنه انصار العقيده وللمجد نضمن رصيده
وما نعوفك لو الف موته نموت

* * *

يا حسين انت الضمير الحطت بالمحور الاوسع
وهذا صوت التضحيات اليدوي بالعالم الارفع
نضحي للدين ابدمانه وكبلك انقبّل المصرع
منهجاك بينه منغرس ومنك تعلّمه الدرس
للمبدأ نضحي النفس وللظلم هيهات نخضع
بالتصدي والصمود وبالكفاح
نشترى المعتقد ونبيع الارواح
ولفتح مكه نعيده وللمجد نضمن رصيده
وما نعوفك لو الف موته نموت

* * *

لا تنازل لا خنوع ولا تهاون بالمسيره
وفلسفة ثورته تظهر من نتائجها الاخير
واليغز هاليوم دمّه باجر يأنبه ضميره
وفكرة الشخص الواقعي كل ثوره تحتاج لوعي
القائد الحر اللوذعي هوّه ليقرر مصيره
هاذي ثوره اتفجرت ضد الطغاة
وشرعت للبشر قدسية الحياة
نوضح الفكره السديده والمجد نضمن رصيده
وما نعوفك لو الف موته نموت

* * *

يا حسين انصارك احنه وموقف الثوره تحتم

گبلك انخوض المنايه ونكتب الاعراف بالدم
واليريد أيعيش خالد لو رخص دمه ميهتم
بالحومه گبلك نذبح والجرح لمن يفتح
نترقع انسميه جرح اسمه ثغر الحگ تبسم
جروحنه شفايف وضحكت للخلود
والدمه الينهدر ميثاق وعهود
يوغى هالناس البليده وللمجد نضمن رصيده
وما نعوفك لو الف موته نموت

* * *

يا حسين انت الكيان البيك هالعالم تحرر
كيمياء البشر انت ومعدنك بالثوره يظهر
والفلزات اجمعتها وعنصرك عنصر الجوهر
معدن كرامات وشرف أيميز الدر من الصدف
وعسكر ابن زياد انكشف انذلكه اشما راد يحذر
احنه انصارك ومنبايع يزيد
نضحى بالدم وابد ميموت الشهيد
وللكفر منصافح أيده وللمجد نضمن رصيده
وما نعوفك لو الف موته نموت

* * *

انفتحت ابواب المعارك والسيوف علينه شارر
وهذا صيوان النبوه الي فلول الكفر دارر
زحفت علينه الكتايب بالطمع والجهل سارت
واحنه العلينه نفتدي وبمنهج الحگ نفتدي
ندحر الطاغى المعتدي اشما علينه الدنيه جارت
دنيه من غير الكرامه ما نريد
وللظلم هيهات نصبحله عبيد
العمر بالذل ما نريده وللمجد نضمن رصيده
وما نعوفك لو الف موته نموت

* * *

يا حسين امنحه فرصه نريد ندخل للمعارك
بالحرب گوم آل اميه اشما تعدد بالمسالك
هالنصر مضمون النه وهيه توگع بالمهالك
امنحه رخصه للحرب خل نكلب الحومه كلب
ومن تظل وحدك بالغرب ييتدي الموقف الحالك
نبيع دمنه ييو اليمه ونشترك
ريت عدنه الف روح ونفتديك
وندرك الغايه البعيده وللمجد نضمن رصيده
وما نعوفك لو الف موته نموت

* * *

دخلوا انصار الإمامه لساحة الطف بهمهم
وشالوا الكوفه وزلمها وخيلها بصارم شيمهم
حاموا حدود المخيم بالوفه وغيره عزهم
لسيوف أذنت للحرب وكثروا بايمان الكلب
وسجدوا على وجه الترب والوضوء بفيض دمهم
جسومهم سجدت بساحات الكفاح
وروسهم ركعت على روس الرماح
وصوتهم ردّ نشيده وللمجد نضمن رصيده
وما نعوفك لو الف موته نموت

* * *

اشلون صفوة فخر ضحوا للنبوه وللإمامه
جروحهم صارت شفایف تبتسم لاهل الكرامه
بعد ام الدهر ما تنجب مثلهم بالشهامه
هالصفوه للمحشر يظل موقفهم
ورب الجلاله بهالفخر شرفهم
والقلم عاللوح بكرم وصفهم
يشهد التاريخ بيهم وبمواقفهم الحره

* * *

طهران / ۱۹۸۱ م

هتاف الأحرار

احرار نتحدى الظلم ونعيش احرار
ما نخلف بالعهود دم التضحية شهود
نتحدى الظلم ونعيش احرار

* * *

احنه احرار العقيدة وبالعزم نرفع لواها
يرفر بأسم الجلاله وغايته يكسب رضاها
وصرخه من جوف الضمير ارتفعت ونسمع صداها
من دمنه نروي المعتقد هيهات نخلف بالعهد
وانقصم قيود الشدد وللقيم نحمي حماها
ثوار ارتفعت بالمجد صرخة الثوار
بالموقف المشهود دم التضحية شهود
نتحدى الظلم ونعيش احرار

* * *

قمة التاريخ احنه وللظلم نكشف اساسه
نقتدي ابنهج الشهاده عن بصيره وعن دراسه
بالحروب وبالثبات وبالشريعه وبالسياسه
والچان منهاجه الظلم عالدله حتماً ينرغم
ترتّع على عرش الحكم وبالمظالم والشراسه
اضرار طاغي العصر تالي يشوف الاضرار
والشاهد الموجود دم التضحية شهود
نتحدى الظلم ونعيش احرار

* * *

نصمد وندحر الطاغي وبالثبات نزيل حكمه
اشما يريد يجور لاجن لا تضن يدوم ظلمه
اشمحله لو صارت الوحده والتآلف بين الامه
اهل المجد من تأتلف كل انتهازي ينكشف

والواقعي ما ينحرف ابفيض دمه يسجل اسمه
ابرار لمن تتحد هالامه الابرار
مجد اللي مضه يعود دم التضحيه شهود
نتحدى الظلم ونعيش احرار
* * *

نفندي الدين ابدمانه ومستمر ركب الشهاده
وبوجهه هالحرايب فتحت ابواب السعاده
تشوف كل مؤمن يجاهد حسب مقدار اعتقاده
والشخص من يملك شيم بالدم يدافع عالقيم
يدخل بساحات الهمم بكل ثبات وكل اراده
انوار من دمه اليفيض اتشع الانوار
عن المبدأ يزود دم التضحيه شهود
نتحدى الظلم ونعيش احرار
* * *

واضح الشخص السياسي من طريقه ومن فكرته
ينظر بعين الصواب وأبد ميعير نظرته
ومن يحلل وضع ثابت أبد ما يخطي ابخبرته
والواعي منهاجه الوفه للدين ابد ميخالفه
يسلك طريق المصطفه وعالوفه تهره فطرته
اسرار من نهج الرساله ظهرت اسرار
وسبطه البذل مجهود دم التضحيه شهود
نتحدى الظلم ونعيش احرار
* * *

حسين رمز الاعتقاد ومثل صبر الهادي صبره
ابچتله مفجوعه الأصول وعالثره جثته موزره
وزينب بايد الاخوه وسدّت عالترب نخره
صاحت صوت يحسين اجتنه العسكر
والاطفال مذعوره هامت بالبر

وانت اليوم جسمك يخويه موذّر

* * *

بين اشرار آل اميه عيلتك ظلت غريبه
ومن طحت عالغيره مرمي رفرف جناح المصبيه
راح صيوان النبوه والخدر شاجر لهيبه
يا مظلوم ريتك تشاهد حالي
بين الكوم متحيّره باطفالي
وبهاليوم منهدم سور العالي
غابت بدور السعاده والحزن بيّن عليه

* * *

طهران ١٩٨١ م

يا شبيهه المصطفى

علي الأكبر طاح ما بين الخيول
والگطع نحره گطع نحر الرسول
بالنبي ينوصف عنه ما يختلف
والگطع نحره گطع نحر الرسول

* * *

بكر بلا موقف الأكبر ظهرت الاسرار منه
يشبه المختار جدّه وأبد ما يختلف عنه
كل صفات النبي الهادي انجمعت بملفظه وحسنه
يحمل صفات الساميه واضع نهج للتضحيه
بساحة الحرب الداميه بالنصر ما خاب ضنه
بزوده الاكبر بالحرب لمن يجول
عسكر ابن زياد ينصاب بذهول
من دخل حومته اتوضحت غايته
والگطع نحره گطع نحر الرسول

* * *

أروع اوصاف المجاهد قدّم بساحة جهاده
وضع للأجيال منهج من صموده واعتقاده
مغرم بحب العقيدة وللحرب يظهر وداده
من اصل حيدر هالفرع حافظ على حدود الشرع
بدم الوريد المنگطع سجل حروف الشهاده
للشهاده من الازل رايد ينول
هاموارد خافيه وتطلب حلول
من وگع عالثره وجثته موذره
والگطع نحره گطع نحر الرسول

* * *

الاكبر بساحة جهاده ضحّه من اجل العقيدة

وبسم أبو السجاد صوته ارتفع ويردّ نشيده
وانحسم موقفه الدامي وبالابه ضامن رصيده
شاب ودخل للمعركة وصوت الشهادة يباركه
لدرب العقيدة سالكه وضامنه بقطعت وريده
حارت الافكار عن وصفه شتگول
والشرح عن سيرة الاكبر يطول
للشرح تختصر بالدمه منتصر
والگقطع نخره گقطع نخر الرسول

* * *

رؤع صفوف آل اميه بصارمه وساعد يقينه
اومه عالموت بيساره وشار عاجنه بيمينه
استشهد لأجل العقيدة وضحه دمه لأجل دينه
لمن صعد فوگ المهر للعطش يطويه بصبر
ضامي ورجع لبن الطهر يصيح وين حسين وینه
يصيح جبدي ملتهب بين البتول
وادري بيني وبينك العسكر يحول
صبره والده واتجه للعهده
والگقطع نخره گقطع نخر الرسول

* * *

والده ناداه بيني ابذل اعلى الموت جهديك
چاس من منبع الكوثر بالحشر يرويك جدك
ساعه وتنول الشهاده، خل يصيب العطش جبديك
ارشد لجدنه المصطفه يسگيك چاسات الوفه
ادري العهد ما تخلفه بالدمه توفيلي عهدك
دمع أبو السجاد عالاكبر هطول
يعلم بنور الولد بالطف يزول
للحرب من نزل بالسيوف انچتل
والگقطع نخره گقطع نخر الرسول

* * *

طاح الاكبر بالمعاره وداست الخيل اعلى جسمه
عالبعد من المخيم ينظر عليه أبو اليمه
حسين لمن شاف الاكبر عاثره مخضب بدمه
عالوالد الموقف صعب من شاف الاكبر عالترب
والجسم بالدم منخضب حنه ظلوع الحزن يمه
دموعه صبها اعلى الولد مثل السيول
وفوك الاكبر شابجه رماح ونصول
طايع امصرعه وجثته مغطه
والگطع نخره گطع نخر الرسول

* * *

حسين من شاهده لابنه من دمه الهامه تعقر
صاح يا هاشم اسرعوا وبدليله النار تسعر
ساعدوني اعلى المصيبه وشيلوا جثة علي الاكبر
واقه اطلعت من الخيم مرعوبه وتنادي بألم
دلالي باللوعه علم ومثل جسم ابني تودر
تنادي حالك يا شهم اصبح مهول
ابطيحتك يا فرع مفجوعه الأصول
الوالده حايره والولد عاثره
والگطع نخره گطع نخر الرسول

* * *

ليله صاحت صوت يبني من شفت جسمك رميه
اهجس بيوت الكرامه بكر بلا انهدمت عليه
لليسر أمشي واعوفك نايم بحجر المنيه
ليله الغريه بكر بلا مرعوبه
واصرخت صرخه ويه الدمع مصحوبه
جثة الاكبر يا سبب مخضوبه
والگطع نخره گطع نخر الرسول بهالمصيبه

* * *

طهران ۱۹۸۲ م

لمن الشموع

المن هالعرس منصوب جاسم منذبح والجسم مسلوب

المن هالعرس منصوب

* * *

انخت بالصيوان رمله والحزن احنه ظلعهها
تصيح يا جسام ييني چبدتي مصابك كطعهها
يولدي ومن دم وريدك عيني يتفايض دمعها
رملة لولدها تحشمه بصوت المصبيه تكلمه
حنتك صارت بالدمه وحوفتك طقوا شمعهها
أقبل باللذي مكتوب

حكمه واقتضت انظرك مصيوب المن هالعرس منصوب

* * *

اقتضت يا عريس ييني حكمة الحق والاراده
امشي للكوفه يسيره وانت بحجور الشهاده
وشمعة الدين بوجودك تزهو بنور السعاده
وجثتك يا شبل الحسن متغسله بدم المحن
والترب صارتلك چفن ومنها صارتلك وساده
جسمك بالدمه مخضوب

ييني وزفتك فرسان الحروب المن هالعرس منصوب

* * *

اشلون زفة عرس صارت الك يا فخر الهواشم
بدال شمعات الزفاف انرفعت رماح وصوارم
وحافر خيول آل اميه طبول صارتلك يجاسم
ونثارك سهام الحرب وبفگدك يذوب الكلب
لمن طحت فوگ الترب گلي ظل عليك حاييم
گلي من الفراگ يذوب

كل شي حسبت بس فگدك محسوب المن هالعرس منصوب

* * *

يبي ما حسبت اشوفك دامي وموسد الغبره
بهامتك طيرة الازدي آه يبي اشلون طبره
وبدليلي جروح فكدك مو جروح تگول جمره
بدمك لنصرك سجّلت وبهاالشهاده حصّلت
للجنه ادري من دخلت تلگتک امك الزهره
مدمع فاطمه مسچوب
وامك نادتك والگلب مرعوب المن هالعرس منصوب

* * *

فرح دلالي يجاسم من طحت فوك الترايب
صبرت أنت اعلى المنيه وآنه اصبر عالمصايب
بعيني شفت هلال سعدك منحجب بالدمه غايب
بالحرب صارت غيبتك وبگلي طفوا شمعتك
ذابت الروح بفرگتک ومثل گلبك گلي ذايب
گلي بجمرتك منشوب
انادي والدمع بالصرخه مصحوب المن هالعرس منصوب

* * *

يا ثمر روضة حياتي يللي ضحيت بحياتك
حققت كل امنياتي يللي حققت امنياتك
وثبتت اركان الديانه بالطفوف بتضحياتك
دخلت الحروب الداميه وحققت اعظم امنيه
ونجحت الفكره الساميه من دنت ساعة وفاتك
بهاي الثوره يا مهيوب
حصلت الوسام الالك منسوب المن هالعرس منصوب

* * *

رمله من شافت ولدها عاثره مغسل بدمه
فاض دمع العين منها مثل فيض جروح جسمه
مثل ما شافت ولدها منذبح شافته لعمه

جسم أبو اليمه اعلى الثره
متخضبّ بدم منحره
وخيامه ظلّت مسعره
اشلون حالة حزن مرت عالحرم بالغازيه
حايره بفرقة وليها وجارت عليها اميه
وزينب بصوت المصبيه صاحت بوته شجيه
وين التكفل عيلتي
وين الينشف دمعتي
وين اليطقي خيمتي
وين اخويه اللي كفلني وين الاكبر وين جاسم

* * *

طهران - ١٩٨٢ م

نداء الكفيل

هاي رايه ارتفعت بوادي الطفوف
اشترىها بدمي وبقطع الجفوف
ولو عطش كلب اليتامه اكلب الكون ونظامه
اشترىها بدمي وبقطع الجفوف

* * *

گمر هاشم صاح صوت اليوم اظهر اعتقادي
عزم حيدر اصل عزمي وملتزم راية الهادي
لته يسمع صوت اخته من الخيم طلعت تنادي
واصرخت صرخه وبه الدمع يا عمد بيتي المرتفع
حد سيفك بطرف الظلع واحصد رگاب الاعادي
من سمع صوت اخته من بين الخيام
صاح هذا اليوم يوم الانتقام
وسمعت الحره كلامه اكلب الكون ونظامه
اشترىها بدمي وبقطع الجفوف

* * *

سمع صوت اخته تنادي يا سفينة نوح وبنك
ترضه طوفان آل اميه يحول ما بيني وبينك
هاك اخذ سيف العقيده وركزه بقبضة يمينك
ومن تبتعد عن الخيم أنه اكفل أيتام وحرم
ولو صوب عيونك سهم اخذ عيني بدال عينك
كلها يا بت علي تشوفين الخيول
اليوم اصوغلها بدمه العسكر حجول
وبالدهر تبگه علامه اكلب الكون ونظامه
اشترىها بدمي وبقطع الجفوف

* * *

جاوب اخته بصوت عزمه ولاهبه بجسمه الحميه

الباري خصّص ملك صالح يقبض ارواح البريه
وآنه خصّصني الإله بقبض ارواح آل اميه
لازال كلبچ منعطب لو اطفئ جمرات الكلب
لو اكلب الحومه كلب واكّطع العلكمي وميه
اليوم نهرين اخليهن جاريات
نهر من دم العدو ونهر الفرات
والكلب اطفئ ظرامه اكلب الكون ونظامه
اشترىها بدمي وبكّطع الجفوف

* * *

شال جود الماي بيده مثل ما شال الحرايب
للحرب لمن تعنّه الحومه راواها العجايب
بيده سيفه الموت ضيفه واخذ حيفه من الكتايب
ليث وحمل بيده الاجل لمن نزل كف الوجل
الجيش انذهل لمن وصل والنجم من سيفه ثاقب
گمر هاشم لازم حدود الخيام
يا هو يگدر يوصل لحد الايتام
سيفي بالهگ التزامه اكلب الكون ونظامه
اشترىها بدمي وبكّطع الجفوف

* * *

السيفه سلّه الجمع ذلّه وحمل حمله الجيش شلّه
بذل جهده وعبر حده وگف وحده يحامي اهله
الرمحه شاله الجيش هاله النصر ناله وبي تجلّه
شوف الگمر يم النهر نال الظفر من المنحدر
بيده شهر موت الحمر ابجّقه ضرب السيف يحله
صاح صوت وزلزل العالم صداه
والاملاك البالسمه صاححت وياه
تضحيه لاجل الإمامه اكلب الكون ونظامه
اشترىها بدمي وبكّطع الجفوف

* * *

بيده حامل سيف فاصل غضب نازل عالمنازل
الحرب داره وشعل ناره واخذ ثاره بلا تنازل
الحومه شبها حين طبها العالي ذبحا على السافل
بزوده الشهم صد الزلم بيده الحتم من يغتنم
اصل الحلم روح العزم للعقيده بعزمه كافل
ملك ماي المشرعه بمهمه وصمود
ونفذ سهم الفاجعه وصوب الجود
ورفع صرخة انتقامه اكلب الكون ونظامه
اشترىها بدمي وبكطع الجفوف

* * *

ما كدر للخيم يرجع وضحه روحه لاجل دينه
وانشهر سيف المنيه وكطع يسراه ويمينه
عالنهر سهم ابن كاهل صاب للعباس عينه
والگمر طاح بمصرعه
وزينب لگت عالمشرعه
چفوف الكفاله مكطعه
وراح أبو السجاد مسرع حنه ظلع الحزن يمه

* * *

طهران - ۱۹۸۳ م

ابناء علي (عليه السلام)

نقارنهم بالأفكار النبوه وحامي الجار
يا هو الوفه بميعاده ومثله ضحّت اولاده
خل نكشف هالاسرار النبوه وحامي الجار

* * *

يا علي كوّنك ربك حليه من جوهر بهاءه
ونورك من نور ذاته ونورك يشع بضياءه
ومنحك أعلى المراتب فوگ رسله وأنبيائه
نبدي من آدم بالشرح موقف أولاده متضح
قاييل ابد ما منصلح غدر هاييل بغبائه
اريد انشد يقاييل

لش غدرت هاييل

شوف بكرىلا الاخوه تتفازع على لنخوه
وضحّت لجل الاطهار النبوه وحامي الجار

* * *

يا علي انت المعالي وينه ليضاهيك وينه
خل نقارن ويّه نوح نشوفه من سوّاه السفينه
راده لابنه وياه يصعد وابنه متزعزع يقينه
كنعان ابن نوح ابتعد عن السفينه وما صعد
وبوالده خان الولد بفعله خالف امر دينه

اريد انشد ابن نوح

يگدر يفتدي الروح

ريته بكرىلا يحضر وينظر موقف الاكبر
افتدى بروحه للاخيار النبوه وحامي الجار

* * *

يا علي زمام العوالم بيدك وحكمك يديره
موقف سليمان خل نشاهده بعلم وبصيره

الباري بالحكمه هدا له عرش بلقيس الأميره
سليمان حصّل عالحكم وبلقيس لامره تنرغم
ما شاف ذره من الظلم ولا عبر فتره خطيره
خل ينظر سليمان
جاسم على التربان
ذبيح بليلة الحنه وبهالعرس متهنه
ونظل نعدّد ادوار النبوه وحامي الجار

* * *

يا علي بسيرة حياتك يعجز لساني يوصّف
ويّه يعكوب ارد اقارن واليحيكم كون ينصف
للعب ارسل اولاده وبالحقد خانوا بيوسف
هاموقف اصبح متضح يحتاج ابعاد وشرح
يوسف عدل ما منذبح ليش ابوه دموعه تذرف
على يوسف العبرات
بعده عدل ما مات

تعال وشوف أبو اليمه جسمه تغسل بدمه
وگبله افتدت الانصار النبوه وحامي الجار

* * *

يا علي صبر البگلبك ظهر من صبر الجلاله
نقارنك ويّه الخليل ونحكم بحكم العداله
انشاهد اسماعيل ابنه للذبح مندهش حاله
اشما راد يظهر طاعته ما وصل سيف لركبته
راحم الباري بحالته وكبش عن ذبحه فدا له
من محكم التنزيل
خل ينظر اسماعيل
لگمر عدنان ويشوفه ذبيح مگطعه چفوفه
وضّح درس الاحرار النبوه وحامي الجار

* * *

يا علي صبر الاله ابكلك انخرنت اسراره
وموقف إبراهيم خل انواصله ونعرض ادواره
انشوف نمرود اللعين اشلون لمن شعل ناره
والنار لاهبها اعتله ودور الخليل انواصله
برد وسلم صارت اله وانطففت باول اشاره
نيرانك ينمرود

بالطف ردّت ردود
حسين التهب صيوانه وبكل كلب نيرانه
وتألموا بالنار النبوه وحامي الجار

* * *

يا علي كل نبي ومرسل الك ساييل دمع عينه
يا هو مثلك ضحّه روحه وأهله وأمواله وبنينه
ويا هو من الرسل ابنه للنجاة اصبح سفينه
انت الشرع والسنن يا داحي الباب
من مثلك استشهد ابوسط المحراب
يا من لكل غالب ابسيفك غلاب
انت كنز الخافيات وانت سر الاسم الاعظم
ريتك اتشاهد اولادك لمن اتغسلت بالدم
وزينب تنادي يخوتي سورنه العالي تهدّم
والحرم ضاعت من عكب واليهما
والخيم نار الكوم تسعر بيها
وايتامكم يا حيدر مسلييها
هاذي حالة آل هاشم والعهده جاروا عليها

* * *

طهران ١٩٨٢ م

النبراس

بالشهادة يهتف لساني وضميري
وعمصير الأُمّه يتقرر مصيري
والدمه توضّح الفكره والنحر مشعل الثوره
بالشهادة

* * *

ندرس اهداف الشهاده ونشرح الوضع المعاصر
نشوف ناس لأجل حُكْمها تدافع بقطع المناحر
وناس بالغش والخيانه تريد بالأُمّه تتاجر
والفاهم يخوض الوضع وبفكر واعى يطلع
بأهل الخدع ما ينخدع ويقتدي بأهل الضماير
من ضميري انتظر وحدة الأُمّه
والشعب من يتّحد يوصل القمّه
وما يموت اليفدي عمره والنحر مشعل الثوره
بالشهادة

* * *

كل شعب بالاتّحاد وبالفكر يضمن رصيده
وندرى درب الانشقاق يشّت الأُمّه المجيده
والنصر للدين اصبح أصل غايته البعيده
والشعب لمن يتّحد يتوصّل لأفق المجد
نريد الكوادر تستعد وتفتدي لنصر العقيده
بالتفادي والصمود وبالإخوّه
نحقّق الاهداف من نهج النبوّه
والشعوب تعيش حرّه والنحر مشعل الثوره
بالشهادة

* * *

كل شعب يملك قياده وبالقياده اتّصّاله

وينجح القائد المخلص واليضحّي للرساله
وسبب افشال الشعوب القائد اليهودي العمال
والقائد اليفدي العمر هوّ اليحصل عالنصر
واجبّه شعبه ينغمر ويقتدي بسيرة نظاله
للعقيده نضحّي ونحصل الشهاده
وما نميل ونحرف عنّ القيادة
ونسرع لتنفيذه امره والنحر مشعل الثوره
بالشهاده

* * *

كل بشر يحمل عقيدته ولجل هالفكره يناضل
منها دركتها الحقيقه ومنها سارت على الباطل
واحنه فكرته الاسلام ومن اجل شرعه نقاتل
نسلك طريق التضحيه وندخل الحرب بتوعيه
ونيل الشهاده الامنيه والرفض هالفكره فاشل
بالضماير ندخل الحومه ونجاهد
ونضمن استقلاله بسيرة القائد
ونصبر بمقياس صبره والنحر مشعل الثوره
بالشهاده

* * *

احنه عاهدنه نضحّي وهالعهد نبدي التزامه
ندحر الطاغية وعرشه وللظلم نكشف ظلامه
تنتظرنه هالشباب بالبالسجون وهاليتامه
نطالب بتحرير الوطن وما بيننه تدور الفتن
والشعب اصبح مرتهن بيد هالطاغي ونظامه
عالمناصب نسعى وتفرق شملنه
ونتظر من غيرنه يحرّر وطنه
يمته للمبدأ نصبره والنحر مشعل الثوره
بالشهاده

* * *

دارت الدنيه بوطننه واصبح بحاله خطيره
يريدنه نضحيله دمنه والبشر هوّه وضميره
ولو صدگ احنه نجاهد خل نواصل بالمسيره
من الفتن خل نحترس وللمبدأ نضحّي النفس
ونلقّن الظالم درس وهاذي أيامه الاخيره
من دمانه ترتوي روضة بلدنه
ولو صدگ احرار ما ننقض عهدنه
وطوگ هالظالم نكسره والنحر مشعل الثوره
بالشهاده

* * *

بالدهر مثل أبو اليمه ما حصل واحد مجاهد
باع دمه للشريعه واسمه ظل بالدهر خالد
ومثل وكفت گمر هاشم بالوفه ما وكف ماجد
والاكبر بدم الفخر عنوان سجل بالدهر
وجاسم يتبعه بالاثّر بالحرب قدّم الشاهد
بفيض دمه سجل حروف الكرامه
ضحّه روحه للنبوّه وللإمامه
وجسمه متوسّد الغبره والنحر مشعل الثوره
بالشهاده

* * *

نطوا دمهم للعقیده مو لجل حفظ المناصب
تغسلوا بالدمه اليجري والچفن ذاري الترايب
سبعه وثمانين ثائر غابوا ابرج المصاب
وظلت حرمهم بالغرب مرعوبه
وخيامهم متسلّبه ومنهوبه
وايتامهم متچتّفه ومسلوبه
طلعت منّ الغاضريه ميسره لديرة الكوفه

* * *

قم المقدسة / ١٩٨٣ م

لماذا قتلوه

غريب أيودّع العيله الغريبه
وزينب صاحت ابصوت المصبيه
هاك اخذ الطفل هاك خل يندبح وياك
وزينب صاحت ابصوت المصبيه

* * *

هايم ابعالم شعوري وانظر ابعين المصبيه
والمشاعر جسدتلي صور عن الطف عجيبه
شفت أبو السجاد واكف يم العيال الغريبه
والحرم مغطوعة امل والدمع عالوجنه همل
واشلون توديع الحصل بين محبوب وحيبيه
دمع وفراگ واحزان ونوايب
لن يستمع صوت امّ المصايب
تصيح الطفل بحماك خل يندبح وياك
وزينب صاحت ابصوت المصبيه

* * *

هالرضيع من ايد زينب سلمته لايد أبو اليمه
او والده ابصدر العواطف والحنان لصدرة ضمّه
يقبله ابرگبته التزهى ويلثم اجبينه ويشمّه
ودموع أبو اليمه تسح موقف رضيعه متضح
مثل الحمامه التندبح ومن رگبته يسيل دمّه
وهاي امّه الرباب احنت ظلّعها
وتخاطب أبو اليمه بدمعها
هذا الطفل يهواك خل يندبح وياك
وزينب صاحب ابصوت المصبيه

* * *

بوسط صيوان النبوه حاله تمتاز بحزنها

والرباب أيشب گلبها لمن تشاهد ابنها
گبل رميات المصبيه سهام فگده صوبنها
معوله وماخذها الحزن ابلوعتها باللوعه تحن
تفسر الصخر لمن تون وصار فن النوح فنها
وزينب شاهدت امه الحزينه
يم مهده تصيح الطفل وينه
ييو السجاد ارجاك خل يندبح وياك
وزينب صاحت ابصوت المصبيه

* * *

آنه ام الطفل آنه وتدري خانتني الليالي
عگب عبد الله الرضيع ايصير حال الكدر حالي
تدري اصعب كل مصبيه من تشوف المهد خالي
هاي الرباب المعوله تصيح ابدامع هامله
ما چنت ادري بکريلا يصير شرب الماي غالي
هذا الماي ملك امك الزهره
وابنك بالعطش ملتهب صدره
اخذ الطفل لعداك خل يندبح وياك
وزينب صاحت ابصوت المصبيه

* * *

حسين من شاهد الموقف سالت دموعه اعلى خده
اخذ عبد الله الرضيع لآل اميه وزاد وجده
صاح هذا الطفل ذاب وبالعطش ملتهب چبده
هالطفل چبده ملتهب لا تمنعونه من الشرب
وانچان الي وياكم ذنب هالطفل يا ذنب عنده
يناشد لچن يا وسفه جوابه
تعنه حرمله وللطفل صابه
صاحه ارتوي من دماک خل يندبح وياك
وزينب صاحت ابصوت المصبيه

* * *

حسين من نحر البرائه اخذ دم الطفل بيده
للسمه أرما وصاح بيا ذنب كطعوا وريده
ما نزل للارض دمه بهاذي اسرار البعيده
لن سمع صوت من الخيم يحسين دلالي علم
عبد الله بالنبله انقطم والسهم طوگه لجيده
آنه ام الحزن فاجده الغالي
اصد اعلى المهدي والمهد خالي
بطفلك گلي وصاك خل يندبح وياك
وزينب صاحت ابصوت المصبيه

* * *

رد أبو اليمه لخيامة وييده طفله افغرت روحه
للطفل ضمّه اعلى صدره خاف عين امه تلوحه
مادره ابگلب الرباب اعلى السبي انفتحت جروحه
من شاهدت عبد الله بيد المظلوم
جسمه الشريف امغسل بفيض دموم
وگبل الفطامه ابسهم ظالم مفطوم
لبو اليمه بالمخيم والطفل سلّمه لزینب
عگب ما ودّع العيله لگطعت المنحر تأهب
مثل كطعت نحر عبد الله انگطع نحره وتخصّب
وحسين لمن وگع فوگ الغبره
شاهدنه دم طبره يكت ابطبره
والخيل داست بالحوافر صدره
بالسهم وبالسيوف اندبحوا حسين ورضيعه

* * *

الحوار المؤلم

ياغسلوك ابدمك راسك يودّع جسمك
واسمعه شكوات الحال بس حرم ظلت واطفال
ياغسلوك بدمك

* * *

اتصورت حالت موادع راس الحسين ويه جسمه
واحد امعّقر بذاري وواحد مغسّل بدمه
وبدت شكوات الحنان الجسم يشكي لراسه همه
يا راس شفت اللي جره خلوني مرمي اعلى الثره
من چقيّ كطعوا خنصره وطحت بين اشرار الامه
يا راس اعرض امري

متغسل ابدم نحري
ومچقن بذاري رمال بس حرم ظلت واطفال
ياغسلوك بدمك

* * *

عرض جسم حسين حاله وابتدى الراس بجوابه
آنه خدري ابشره المصرع تعقر بذاري ترابه
للحجر يا جسم حگك ما شفت لوعة صوابه
يا جسم تنظر حالي متخضب ابدم هامتي
وبالحجر صابو جبھتي وجهي من الدمه خضابه
لو ما يصوب هامتي

ما تنسلب ايتامي
ولا چان شافت احوال بس حرم ظلت واطفال
ياغسلوك بدمك

* * *

والجسم حضّر جوابه لاچن من الدمه اليجري
انت بس الحجر صابك وشاركتني ابكع نحري

لاچن آنه اعلى الوطيه جالت الخيل اعلى صدري
يا راس حالي اتشاهده عالغبره جتّه موسّده
جالت علي خيل العده وفوّضت للباري امري
يا راس شاهد حالي
متوسّد اعلى رمالي
وبالغرب خلّيت عيال بس حرم ظلّت واطفال
ياغسلوك بدمك

* * *

يا جسم لا تشكي حالك لو تشاهد حالي اصعب
بالبواتر طبروني وشيبي من دمّي تخضّب
وانشدك هم شفت راس اعلى الرمح مثلي تنصّب
يا جسم فاجد ناظري ريتك تشاهد منظري
مرفوع فوگ السمهري وتاجي من عندي تسلب
يا جسم ما رحموني
فوگ الرمح شالوني
وشاهدت من عالعتال بس حرم ظلّت واطفال
ياغسلوك بدمك

* * *

لا يراس حسين چنّك ما شفت سهم البچبدي
بسهم المثلث رموني والجرح لساعه يدي
ومن الم سهم المثلث بعد ما ظل حيل عندي
بالسهم صابوا چبدي والگوم سلبوا چتي
لليسر تمشي بعيلتي وراح اظل عالغبره وحدي
بدم النحر غسلوني
بذاري الترب چفنوني
والگوم گطعوني وصال بس حرم ظلّت واطفال
ياغسلوك بدمك

* * *

الراس جاوب لا يجسمي حالي منك أشد وخطر
انته ما عندك مسامع تستمع صرخة الخدر
وما شفت نار المخيم أنه شفت النار تسعر
أنه اسمعت صوت الحرم وشاهدت نيران الخيم
والاشد واصعب كل الم من شفت غارت العسكر
شاهدت حرگ خيامي
واسمعت صوت ايتامي
وتعلم السجّاد شگال بس حرم ظلّت واطفال
ياغسلوك بدمك

* * *

هنا يراس حسين يلّي عندك عيون وتشاهد
لليسر امنت عندك عيلتي وتقدر تعاهد
ترد يوم الاربعين وما تنقص منها واحد
بالحرم يا راس اطلعت عندك اطفالي ودّعت
فوك الرمح انته ركعت وأنه فوك الغبره ساجد
يللي اطلعت باطفالي
سالم ترد بعيالي
والظعن لو عني شال بس حرم ظلّت واطفال
ياغسلوك بدمك

* * *

يا جسم لا تشكي أمرك من تظل وحدك رميه
اتحملت آلام لاچن بس مرامي الغاضريه
أنه راح اكفل عيالي اللي مشت عنك سبيه
بالحرم راح امشي بيسر واتحمل آلام وصبر
والاشد من هذا الأمر لو شفت گوم آل اميه
متشمتته بحالتنه
ومستبشره بطلعتنه
ونحمل سياط الجمّال بس حرم ظلّت واطفال

ياغسلوك بدمك

* * *

هاذي حالت أبو اليمه كبالنه موقف تجسم
عرض راس حسين حاله وحالت الجسم المخدّم
نريد ننشد عالمصايب يا مصيبه الاشد واعظم

حال التغسل بالنحر

لو حال النصاب بحجر

يا هو الاشد واصعب وامر

جاوبوا يا حال اصعب حال التوسّد رماله

لو الراح وبه اليتامه باليسر كافل عياله

عالجسم هالمحنه فضّت بالطفوف إثمّا جراه

اشحال اليروح وبه الحرم

للكوفه والشام بالم

يظلل يعوّض عالحيم

عالرمح مرفوع راد يعوّض الرايه اللي طاحت

* * *

طهران ١٩٨١ م

كيف ترضى

ما اظن يحسين تقبل شيمكم
للكوفه والشام تطلع حرمكم
يا خويه هالحكمه اقتضت نطلع يساره
عنكم مشينه بهاي الظعينه

* * *

هايم بعالم شعوري وگلبي بالاحزان يلهب
وادخلت باعماق فكري وچي انظر حال زينب
وگفت اتعاتب أهلها وتذكر الخدر المسلّب
صاحت بصوت النايه زينب انه المتحجّبه
تالي صرت متغربه والخدر مني تسلّب
عگبك بمظلوم سلبوا ايتامي
وبنار المصاب حرگوا خيامي
وصيواني بگلوب الحرم تلتهب ناره
وعنكم مشينه بهاي الظعينه

* * *

خويه شحچيلك بيوم اللّي طحت من فوگ مهرك
ريت سيف الگطع نحرک گطع نحري گبل نحرک
وينسحگ يا ريت صدري ولا تدوس الخيل صدرك
عالغيره جسمك من وگع وگبالي شاهدته انصرع
سبّاح دلالي انگطع وخلص عمري گبل عمرک
من هجمت الخيل لو چنت يمنه
ما چان الاشرار حرگوا خيمنه
ولو وگع عامود الخيم ينهدم داره
وعنكم مشينه بهاي الظعينه

* * *

اشلون مر نهار بالطف والخدر تلتهب ناره

ومن لفانه الليل شفته الليل افجع من نهاره
حرت اجمع هاليتامه لو ألم خدر حياره
محتاره اختك بالأمر وتنتظر مطالع الفجر
متهيت لهظم اليسر وجمعت العيله اليساره
واهدوة الليل اسمع منادي
لليسر يردون عيلة الهادي
واسمع العيله تنادي وينه اليحمي جاره
وعنكم مشينه بهاي الظعينه

* * *

للسي الجمال صاح ابغية ارباب المچارم
من عكب ذاك الدلال وعكب راية كمر هاشم
شفنه شمر ابن ذي الجوشن يحدي بطعون الفواطم
اشما رده توديع الجثث يا خويه يمنعه شبت
للكوفه مشونه ابعث وباليسر شفنه المظالم
بس حرم وايتام ما عدنه والي
وانظر السجاد مجتف كباالي
ومن السلاسل ركبته دمها ايتجاره
وعنكم مشينه بهاي الظعينه

* * *

خويه طول الدرب نمشي والكلب عالكرم خوفه
خدر انصانت بعقه خيالها محد يشوفه
عكب ذيج الهييه تالي باليسر تمشي للکوفه
ما تدري يحسين اشجره ابحال الحرم المخدره
بالکوفه ظلت حايره والدهر شرع سيوفه
ما تعلم شصار ابهاي الفواطم
دخلوها الاشرار لمجلس الظالم
بيا وضع اختك طببت لقصر الاماره
وعنكم مشينه بهاي الظعينه

* * *

عيالك ابقصر الاماره يبو اليمه دحلوها
ابمجلس ابن زياد رغما هالأرامل وكفوها
الناس بيها مستخقه وبالشماته صوبوها
والطاغي صدر هالامر للشام نطلع باليسر
واخذونه گوم اهل الغدر ولليتامه چتقوها
واطلعنه للشام بهاي المصايب
واتباري الضعون روس الغوالب
وراسك يخويه اعلى الرمح تسطع انواره
وعنكم مشينه بهاي الظعينه

* * *

من وصلنه الشام شفته الشام فرحانه بوضعنه
وتعلم ايمجلس الطاغي چم وچم محنه جرعه
وطفله من هاي اليتامه انفگدت وبيها انفجعه
من الشام كابدنه الحن وبدمع عيني اتوضحن
اگعد استقبل هالظعن اليوم يم گبرك رجعه
ردينه هاليوم للغاضريه
نرويلك اعمال گوم آل اميه
واليسر من دمع الحرم تاخذ اخباره
وعنكم مشينه بهاي الظعينه

* * *

آه من ساعة البيها بكر بلا انفگدت اهلنه
بگينه بالغربه حياره وما حصل نغار انه
راحت اهل العزم راحت وانفگد بالطف املنه
ودلاي مل من الصبر
وگلب الحرم يلهب جمر
هذا الحصل گبل اليسر
واليسر اصعب سهامه من مرامي الغاضريه

* * *

طهران / ۱۹۸۳ م

راية الحمد

يا علي ابزودك حملت الرايه آيه وبيمينك رقت آيه
اتجاهد ابروح الوفه لجل دين المصطفه
آيه وبيمينك رقت آيه

* * *

يا علي ابروح العقيده انصرت دين الله ورسوله
عن يقين وعن درايه الزودك انعدد فصوله
بالعباده وبالسياسه وبالعلوم وبالبطوله
والاسلام ابتضحياتك ثبتت افروعه واصوله
وضحت منهاج الشرع من تضحياتك يا ورع
والدين باسمك مرتفع يا رمز معنى الرجوله
يا شهم مثلك بذل مجهوده والمواقف من بدر مشهوده
والشرع ييها اکتفه لجل دين المصطفه
آيه وبيمينك رقت آيه

* * *

يا علي ابصفحة العصمه امسجل احروف الأطاعه
مهد صارتلك الكعبه ومن ثدي العقه الرضاعه
وشخصك من أوصاف أخوك المصطفى ظهرت أطباعه
ومن بدر تاريخ زاهر الك يشهد بالشجاعه
تاريخ من وقعة بدر للدين ضامنله النصر
ودمك ييو الحمله حبر سجلت بيه البراعه
بسمك احروف المجد مكتوبه منك كلوب الزلم مرعوبه
العزمك احنه انوصفه لجل دين المصطفه
آيه وبيمينك رقت آيه

* * *

يا علي ويوم المباهل كل موحد بيه شاهد
الله خصك من محمد روح وحده ابجسد واحد

والذي ينكر الآيه ذاك من أصله معاند
وابجهاذك للعقيده ما حصل مثلك مجاهد
يا علي وهاي المعرفه تتكرّس ابروح الوفه
ابشخصك الاسلام اكتفه لدينه من أصبحت قائد
قائد الدين الحنيف ابزودك اتضحى لجل المعتقد بوجودك
عن بصيره ومعرفه لجل دين المصطفه
آيه وبيمناك رقت آيه

* * *

يا علي راية مُجّد رافله اقبضة يمينك
ثلاثه وثمانين غزوه شاركت وانصرت دينك
حارس احدود الرساله وما غفت عالدّه عينك
ولمن تطلع للمعاره ليث طالع من عرينك
ابسيفك الأّمه اتوحّدت ومعركه خير من بدت
بيك الشجاعه اتجسّدت وعالنصر ثابت يقينك
ابسيفك انصار النبي منصوره ورايتك بالمعركه منشوره
للعقيده امرفه لجل دين المصطفه
آيه وبيمناك رقت آيه

* * *

يا علي صارمك هلهل وابضمير الكفر ينصب
ورايتك لمن تمزها العالي عالسافل تكّلب
ترجف الحومه وزلمها اعليها وجهك حين يغضب
ثبتت أركان الديانه بيبك يا چتال مرحب
لو رسخ جدمك بالوغه وچفك تملك بيرغه
أيزعزع الطاعي اللي طغه وللنصر عزمك تأهب
هذا مرحب خل نذكره ايومه ظريه وابوجه الدهر مرسومه
اشلون ضربه خاطفه لجل دين المصطفه
آيه وبيمناك رقت آيه

* * *

يا علي دمك شعاع وزهى بأفاق الشهاده
ابدمك اتروت الجنه ونمت دوحات السعاده
ورائتك من عكب چفك حسست ابىتم القياده
والحسن من سال دمك سالت دموع اعتقاده
بمصائب الكون اختلف ودمع العقيده ما نشف
وجبريل بالعيله هتف اتهدمت اركان العباده
ابطيحتك طاع الشرع بنيانه والاسلام اتهدمت اركانه
والمدامع ذارفه لجل دين المصطفه
آيه ويمنناك رقت آيه

* * *

يا علي انصابت الامه ايسيف ابن ملجم الصائب
وصارت ابكلب العقيده كل كلب لوعه اصوابك
وخضّبوا وجه الديانه يا علي من دمه اخضابك
وين عنك يبو الحمله ابساعة الضربه أصحابك
وين الاصحاب الطايعه ميثم وحجر وصعصعه
شمس الديانه امروعه وغاييه ابساعة اغيابك
الليله أملاك السممه مفجوعه ولجلك أصوات الحزن مرفوعه
وسال دمع العاطفه لجل دين المصطفه
آيه ويمنناك رقت آيه

* * *

يا علي العالم العلوي يهمل دموع المصيبه
طاح جسمك يبو الحمله وشيبتك بالدم خضيبه
مثل دم السال من حسين والجثه سليبه
شبلك اعله الغبره مرمي وظلت اعياله غريبه
وجسم الكفيل اعلى النهر
ومخيمه ابناز استعر
راسك كبل راسه انطبر
انته بالمحراب طايح والكفيل اعله الشريعه

* * *

طهران ۱۹۸۳ م

النبي ايوب (عليه السلام)

بين موسى وبين أيوب العليل
خل نقارن عن بصيره وعن دليل
ياهو أكثر صابر بأيامه
وما جزع من الدهر وآلام
واليحكّم لا يميل عن بصيره وعن دليل

* * *

بحث موضوعي نخوضه بفكر عاليمان ساير
ونشرح أبعاد المصيبه وتنعرض لاهل الضماير
نستدلّ بمصحف الباري ونقارن بالبصاير
الكاظم وأيوب بورع نظرهم من المرتفع
ونشوف يا هو اللي جزع ويا كلب عالمه صابر
هاي شكوه نستمعها بأنتباه
يا إلهي مسّني الضر يا إله
وموسى شاهد چم خصم جدّامه
وما جزع من الدهر وآلامه
واليحكّم لا يميل عن بصيره وعن دليل

* * *

نصغي لايوب المسامع ونستمع من عنده چلمه
يا إلهي مسّني الضر وانه لاهل الصبر رحمه
والشخص لو چان صابر أبد ما يشتكي همّه
والكاظم بقعر السجن باللّوعه كلبه ممتحن
ما بيّن عليه الحزن وجابه الموقف بچلمه
كلبه صابر والصبر رايد اباة
أبد ما تشكي بنزول الناييات
الكاظم بھالحن شد وسامه
وما جزع من الدهر وآلامه

واليحكم لا يميل عن بصيره وعن دليل

* * *

صبر أيوب بحياته وبالصبر اسمه تخلد
لاجن گبال ابن جعفر صبر البكلبه تفند
بالمواقف نستدل وحكمة القرآن تشهد
أيوب مل من العمر وهدد زوجته بالامر
وكلبه جزع من الصبر مو مثل عترة محمد
شچان سوّه لو دخل سجن الرشيد
وشاهد گباله السلاسل والحديد
هالامر يا هو اللي قاد زمامه
وما جزع من الدهر وآلامه
واليحكم لا يميل عن بصيره وعن دليل

* * *

هالني خلص حياته لعلته يدور شفاها
وروحه من ذيج الامراض اتشافت وحصلت مناها
لاجن جروح السلاسل وين يتحصل دواها
الكاظم بطامورة ظلم ما مثله واحد منظم
وبصيره يتحدّى الخصم وللرتب حصّل علاها
بسجن مظلم والگلب يلتهب نار
وبيه ميميز الليل من النهار
وحمل من ظلم الرشيد اجرامه
وما جزع من الدهر وآلامه
واليحكم لا يميل عن بصيره وعن دليل

* * *

خلص الكاظم حياته بالطوامير المظلمه
وجابه الطاغي الرشيد بهمتته وصبره وبعزمه
وسطرة السندي ابن شاهك للمجد رادت تخدمه
والمجد يعرف صاحبه واتشيد بدم الابه

والكاظم بهالمرتبه صار للاجيال قمه
بالعقیده وبالصبر أرغم انوف
خل يجي للسجن أيوب ويشوف
يا هو حقق بالصبر أحلامه
وما جزع من الدهر وآلامه
واليحكم لا يميل عن بصيره وعن دليل
* * *

عجب العالم بصيره وبالسجن كطعوا جبده
اشلون لو ردنه نفسر للعوالم صبر جده
ضحوا انصاره واخوته وظل أبو السجاد وحده
أعظم كلب بالصبر كلب المظلوم
من ظل وحيد بكر بلا بين الكوم
ويشاهد اعلى الخيم عدوانه تحوم
كل كلب يملك صفات وبيها تتحقق أهدافه
* * *

طهران / ١٩٨٣ م

في قصائد اللطم

يا غيرة الله

(موشح)

يا خلف هاشم ويا نعم الخلف جزت حدها ولىش صوتك ماهتف

* * *

غايب وگلنه الک موعد ظهور تجلى عن الواسعه الغي والفجور
جزت عن هالموعد سنين وشهور وكل نمير الگلب لغيابك نشف

* * *

تدري بغيابك عليه ما يهون وعلى الكعبه بگت تترّبه العيون
والعوادل عن معييك ينشدون ليش غاييكم عن الموعد خلف

* * *

ارد اجاوب لچن ما يحصل جواب حيث عن الوعد طولت الغياب
آه يا من گلبك من الحزن ذاب اشلون ترضه عداك بينه تستخف

* * *

ما نشوفك لچن يا الغايب تشوف الناس تتغير ابتغير الصروف
يغش ظاهرها لچن فارغه الجوف وسر حقدھا الضمته اليوم انكشف

* * *

ما بگت خافيه ونشرحها الک وبيدمن تدري صفه يدور الفلك
واللي ظلت صابره وتتاملك عرّجت ارواحها لبرج الحتف

* * *

جزنه من ارواحنه لاچن نريد تنادي يا ثارات محزوز الوريد
هوّه ذاك اليوم النسميه عيد من نشوف الرايه بيمينك ترف

* * *

اشلون رايه المابرح عنها النصر وجيشك اعداده مثل صفوة بدر
ثلث ميّه وياك وثلاثه وعشر العدد من ذاك العدد ما يختلف

* * *

اشمحلّه لو لوحث ظهر ام العله وتنوي بالمگصد لوادي كربله

وتوگف بمصرع ابن سيد المله مثل جدك عالنهـر لمن وگف

* * *

وتنحني ظلوعك على جسمه السليب وخدك اتعفره مثل خده التريب
وتلگه بعده الشيب من نحره خضيب وحاله ما ينوصف وابدأ منوصف

* * *

هاذي حالة جدك بيوم الطفوف وشابچه عليه العواسل والسيوف
وسجل ابدم النحر اشرف حروف حروف آيات المعالي والشرف

* * *

دمشق / ١٩٨٠ م

العليلة

(موشح)

طفله تتامل خبر غيّابها ليش ابوها لكربلا ما جابها

* * *

ظلت ابيثرب وحيدة فاطمه طفله بصواب المرض متالمه
وعثر وياها الدهر عثرة عمه وشال عنها بليل ضعن احبابها

* * *

طوّح الحادي بضعن هاشم وسار بگت هاي الطفله مدهولة افكار
ليش عفتوني وحيدة بهالديار تناشد ومحد يرد جوابها

* * *

سهرت ليالي على فراش المرض والجفن من عدها ليله ما غمض
جمر فگد الاهل يمشي وبه النبض والحزن زید عليها صوابها

* * *

الجسم متوسد على فراش العلل وروحها ترفرف على ظعون الاهل
بين ساعه وساعه يلفيها الاجل والچبد لاهب بنار عتابها

* * *

مثل حن الرهب هالطفله تحن ومثل ونات الورگ گامت تون
الدار خالي ولبست ثياب الحزن وبالگلب سهم النوايب صابها

* * *

تعتب اعلى حسين من جور الصروف ليش ما وداها ويا للطفوف
ما درت والدها رايح للسيوف لو اجت تحرگها نار مصابها

* * *

تصيح المن بعد اشكي علتي چان يمي الاكبر يرد لهفتي
وگمر عدنان اليسچن لوعتي وعمّتي زينب فجعني غيابها

* * *

وين جاسم وين ابن عمي الغيور وين اخويه زين العباد الصبور
وين عني مشن ربات الخدور بلا وداع اطلعن شنهو اسبابها

* * *

وحدي خلوني وحنوا مني الظلع والجرح لو هاج شيفيده الدمع
ريت سباح البگلبي ینکطع ولا اشوف الدار ینعی غرابها

* * *

خفگ جنح الفاجعه وگلبي علم تالي ترجع للوطن بس الحرم
اظن سور العالي بالطف انهدم وهاشم اتعنت لکطع رگابها

* * *

طهران ۱۹۸۳ م

القرآن الناطق

(موشح)

حسين للمصحف رسم منهاجه بالدماء السالت من أوداجه

* * *

حسين لمن شاف دين الله الحنيف موقفه ابين الكفر أصبح ضعيف
للسيوف اتقدم ابنحره الشريف ويدري دمه للفكر وهاجه

* * *

ابدمه للمعتقد وهج شعلته ودرس للاجيال صارت سيرته
وكعبة الاحرار صارت ثورته والها ثوار المجد حجاجه

* * *

حسين كعبة كل وفي وحر وشهيد وكل غيور الما يمد للذله ايد
ولو دعاه الدين يعرضه الوريد ويخط بالدم صفحته البهّاجه

* * *

الدين نور المؤمن وحفظ العرض الباري جاعل نهجه عالالم فرض
الدين ثابت حكمه مو مسرح عرض ولا وجه تتحكم ايمكياجه

* * *

الدين لو ما حسين أمره يختفي والمجد خل يسد بابه ويكتفي
بعد مثل حسين ما يلگه وفي اشما يمحّص أهله باستخراجه

* * *

حسين صفحه وضمت أسماء الاباة الما تعيش ابذله واتساوم طعاة
ولو اجاها الضيم تختار المماة وللظلم ما تركن لاجراجه

* * *

حسين شاف الظلم خيم غالبلاذ وحكم ابن مرجانه دستور الفساذ
كسر طوگ الذله عن درب الرشاذ وصافن الهجره انصبّ أحداجه

* * *

من مدينة جده شد الراحله وضعنه واصل بالمسير لكريله
بهاأرض مصرع الباري اختار اله وبالشهاده النصر صوّغ تاجه

* * *

بالشهادة حسين عالطاغي انتصر واسمه ظل ايدوي باسماع الدهر
وجسمه بعده امغسل ابدن النحر والجفن ذاري الترب نساجه

* * *

اشما يظل دمه يصب من منحره تظل آيات الكتاب امنوره
حسين بي نلتزم دنيه وآخره بحر طامي وما تحف امواجه

* * *

جسم أبو اليمه سجد لمن وكع وعالرمح راسه قره الآيه وركع
انرفع دين الله لمن راسه انرفع وبعده دم أوداجه فوك أثباجه

* * *

دمشق ١٩٨٠ م

الأماجد

(موشح)

لاح فجر التضحية الموعوده وللقتال حسين صف جنوده

* * *

لاح فجر المعركة والنصر لاح والشهادة اتَّهَيَّأت والسيف صاح

حسين اعلن ثورته لدعوة اصلاح والمجد لاهل المجد مردوده

* * *

لاح فجر الملحمه وخوض الاهوال والسماهر لَوَّحت بيد الرجال

بني هاشم رصدت ابراج القتال للظلم رادت تفصم قيوده

* * *

لاح فجر البية هاشم محربه وكفت لنصر العقيدة مضهضبه

تريد تروي بذرتة ابدم الأبّه والشهادة محتمّه ومريوده

* * *

تأهّبت للموت هاشم والانصار شرّعت سمر القنه وبيض الاشفار

تطلب من حسين تقسيم الادوار وتدخل الحرب وتومض رعوده

* * *

جيش أبو السجاد بالطف اجتمع وقسم الادوار أبو اليمه ابورع

كلمن اموقعه المطلوب انوضع وكلمن أيجاهد حسب مجهوده

* * *

الميسره ابراية حبيب امعنونة ولزهير امنحه زمام الميمنه

وگمر هاشم عالقياه عيّنه وسلّمه رايته وسيفه وجوده

* * *

گبل ما للحومه انصاره تسير لآل اميه وجّه الخطبه زهير

وبعده خاطبهم برير ابن خضير والمسامع بالطمع مسدوده

* * *

الحمله الاولى هوت خمسين الاطياب من نسب طيّب وسادات الاعراب

اتغسلت بالدمه وچفنها التراب هالشهادة من الازل موعوده

الحارث ومالك تعنوا للاجل وعمر بن خالد الصيداوي حمل
وجابر السلماني من بعده انجتل كلمن امتاز ابصموده وزوده

* * *

سعد ابن الحارث وأبو الحتوف ضد أبو السجاد چانوا بالطفوف
حين سمعوا خطبته شهرهوا سيوف ضحّوا لأجله ورضوا معبوده

* * *

ومسلم من استشهد وخدّه تريب لمصرعه ابلهفه تعنّاله حبيب
گلّه ما أوصيك بهلي بالغريب من تحيطه الگوم احمي حدوده

* * *

ام وهب من سمعت اصواب الايتام تناولت عامود من بين الخيام
حملت اعلى الگوم حملة انتقام مثل هاي الحرّه ما موجوده

* * *

وابن ربي چان كاره للقتال وابن سعد يحفّزه لخوض الاهوال
اشما يأمره وإله يبعثله رجال ما ينقذ هالامر وبنوده

* * *

وابو الشعثاء استمع صوت الحسين ينادي ما من ناصر وما من معين
عدّل عن الموقف وناصر الدين وحمل حمله اعلى الكفر مشهوده

* * *

والتفت أبو الثمامه الصائدي صاح يا مظلوم لجلك افتدي
وبخوتي الانصار رايد اقتدي والشهم هاليوم يفني وجوده

* * *

بالوفه اتعنّه حبيب لمصرعه وبالأبه الحر الرياحي تابعه
ونافع المذحجي جثته مگطّعه وحصلّ بهالتضحيه مگصوده

* * *

وعابس الشاكري اتقدم للحرب صاح حب حسين مشغوف الگلب
ابغير سيف اگلبها للحومه گلب بهالشهاده وقّه كل عهوده

* * *

جون مولی أبو ذر حر وفطن ناده وجهي اسود وريحي نتن

ردت دمي ويه دمكم ينعجن هاذي آمالي الذي معقوده

* * *

والانصاري شاب وابن اهدعش عام امه شدت همته لنصر الإمام

هالكواذر يفتخر بيها الاسلام بيدها لسيفه تشد بنوده

* * *

ضحوا الانصار بالعز والوفه ومن بعدهم ضحه شبه المصطفه

وصاح أبو السجاد عال الدنيا العفه طاح من بيت المجد عاموده

* * *

مثل الاكبر ضحه جاسم بالنفس بالمخيّم طقوا شموع العرس

وگمر هاشم عالنهر قدّم درس من هوت چقينه من زنوده

* * *

وصاب عبد الله السهم من حرمله وظل أبو السجاد وحده بكريله

من بعد چتله انسبت هالعايله ومشت للشام بيسر مگيوده

* * *

دمشق / ١٩٨٠ م

الفراق

(موشح)

كُلب ليله أَيْخاطبك يا موحه ومثل دمك فاض دم أجروحه

* * *

كُبل ما يطلع الاكبر للحرب للموادع راد يم امه يطب
لنه يسمع صوت من جرح الكُلب لا تصدع امك بهالروحه

* * *

اسهرت برباك وذخرتك للشدد عاهدت توفيني لا تنسه العهد
وكفتك للدين يالاكبر ضمد اتداوي بيها جبدي المجروحه

* * *

يولدي وللدين مطلوب ابعهود اطلع لميدانه وضمنله الخلود
وكلي لو شافك ابساحات الصمود يلتزم صبره ويبطل نوحه

* * *

خل اشد ابنود سيفك بالدمع لا تهاب الموت دلالي درع
كبابي جسمك أرد أشوفه منصرع وأرد أغسله ابدمعي المسفوحه

* * *

أرد أغسل جسمك ابدمع الفرع وأفتخر واهتف الي شاب انذبح
نصر دينه اموقفه السامي ونجح وهاذي جنات الخلد مفتوحه

* * *

فرصه هذي ولا تخليها تفوت وانه أول هاشمي اتصافح الموت
أرد اسمعك بالحرب تهتف بصوت الدنيه فرصه وللنصر مسنوحه

* * *

من سمع امه تذكره بالعهد احتركت ابجسمه الحماسه وارتعد
صاح هذا الحرب يا ليله اشبعد والشهم بالحرب سره اييوحه

* * *

هذا عهدي وهذا يوم الملحمه واليعاهد شاهد اعليه صارمه
اليوم خيل اعداي احجلها ابدمه وكون أقدم بالطعن اطروحه

* * *

خلها تشهد عينچ وعين الحرب اشما يصير الموقف اكباي صعب
ابسيقي اكتب سنن دستور الضرب والمناهج من بدر مشروحه

* * *

ودع امه ومضه لساحات القتال وبالمهند كلب اصفوف الرجال
ليله شافت الاكبر يخوض الاهوال وعينها لبرج الحنف مشبوحة

* * *

وانخفض للاكبر اجناح النصر حان المكدر وطاح من المهر
ولمن غابت روحه بالبيض وسمر جم جسم بالخيم غابت روحه

* * *

طاح من عالغوج متخضب ابدم والهواشم حملته الصوب الخيم
ليله شمت نحره واتنفس الهم ودوحة الايمان اعطر دوحه

* * *

دمشق / ١٩٨٠ م

يا ابا الفضل

(موضح)

نصبت العيلتك صيوانها مثل ما خانك زمانك خانها

* * *

گوم يا عباس من مصرعك گوم هالحرم يمك على الشاطي تحوم
تشوف جتتك صدگ غسلتها الدموم ونسج الها الترب ثوب اكفانها

* * *

وبعد رادت يا گمر هاشم تشوف صدگ من زنودك مكطعه الجفوف
اتگلك اكعد شوف غارات الصفوف واجت تشكيلك ظلم عدوانها

* * *

وبعد صاحت صوت يا منبع الزود لون ما ينصاب راسك بالعمود
ما تجي الخياله وتدوس الحدود ولا تشب خيامك بنيانها

* * *

وعسكر ابن زياد عالثايه هجم ويده جتالك شعل نار الخيم
لون ما تنصاب عينك بالسهم ما تفر عيالك بوديانها

* * *

فوك جسمك هون ربات الخدر انهض لنخوتن ولا تعتذر
چم شمر جاير عليها وچم زجر والشماته ما خطت نيشانها

* * *

صاحن ابمصرعك انهض يعباس انجان عذرك بالعمد صوب الراس
ظلع اخوك حسين بالحافر انداس ونهض لاخته من سمع اشجانها

* * *

واحنه يا عباس اجينه انخشمك وردنه باصوات الحنان انكلمك
انگلك الخيل اوصلت لمخيمك ومن يرد عن الخيم فرسانها

* * *

تضن عگبك هاشمي ما منچتل لا ولا واحد سلم حتى الطفل
بالسهم نخره انگطع يا ابا الفضل والارواح انسلبت من ابدانها

* * *

ما بگه نغار يحرس عيلتك وسورها اهدم ابطيحت رايتك
عالوطيه اتوسدت كل اخوتك والنبوه انفجعت ابشباها

* * *

عيلتك صابره وداست عاجمر وايد ما ينقبل منك كل عذر
گوم باصرنه لون صار اليسر من يرد عيالك لاوطانها

* * *

دمشق ١٩٨٠ م

فجعت قلبي

(موشح)

يا أمل عمري وربيع أيامي جروح جسمك هيّجت آلامي

* * *

يا ربيع أيامي يا ربيع الجبد اشلون ضمّه الجسمك تراب اللحد

نعش كل عريس ينحطله ورد وما يظل جسمه رهين ودامي

* * *

ليش ظل جسمك رميه اعله الترب لون اتمكن اوسدك بالكلب

امك أنه اشلون ما أحمل غرب وشفّت جسمك منصرع جدّامي

* * *

ابعيني شاهدتك يجاسم منصرع واعلّكت شمعتك من نار الدمع

واصبرت من شفت نحرّك منقطع ردت من دمك أشدّ وسامي

* * *

چنت اتامل ابساعات العرس وأفرح ابزفتك واتطيب النفس

ما چنت أدري بالحاله تنعكس وأنظرك منچتل بالطف ضامي

* * *

اعلّكت شمعة عرسك ابناز الضمه واللي خلاني أظل متألمه

ما شفت عريس يتحنه ابدمه وحوفته اموجره ابناز خيامي

* * *

ويه نار الخيم راحت حوfterك وابوسط دلالي علّكوا شمعتك

چنت أتّلم أشاهد زفتك وساحة الطف خيبت أحلامي

* * *

خابت أحلامي يجاسم بالطفوف شفت حنه عرسك خضاب الچفوف

والشموع ابدالها رماح وسيوف وعگبک سهام المصبيه اترامي

* * *

مضّت سهام الشماته بالدليل عگب چتلك بيني ما ظل بيه حيل

وعالخيم من أگبلك غارة الخيل ما حصل نغار عنها ابحامي

* * *

يبيني لو ما نحرك اتفايض ابدم الخيل ما چان اوصلت حد الخيم
وگوم اميه ما تروع هالحرم ولا تسلب عيلتي وأيتامي

* * *

يا من اتوذرت بالبيض وثمر عگب عينك بعد ما يسوه العمر
اعرفت من بعدك يمشوني بيسر من فضخ هامتك سيف الشامي

* * *

دمشق / ١٩٨٠ م

يوسف الصديق

(موشح)

هالامامه انفجعت بشبانها حزن يعكوب اشد لو احزانها

* * *

انظرنه نظره اويه الفكر متواصله وخذنه موقف حزن من طف كربلا

واجزن يعكوب رذنه نباهله والذي تحكم سور قرآنها

* * *

الحك مثل قرص الشمس ما ينحجب بمصحف الباري بالسوره منكتب

يوسف واخوته راحوا للعب للحرب متوسطوا ميدانها

* * *

رجعوا ويعكوب ناداهم بصوت وين يوسف جاوبوه ساوره الموت

ما تيقن صدك لو خدعه وتفوت سمع بس هالچلمه من لسانها

* * *

من سمع يوسف صبح حصه الذيب ما تمالك نفسه واشتد النحيب

بعده ما شاف الولد بالدم خضيب دموعه علنت بالجفن طوفانها

* * *

يظهر الوالد على يوسف حريص غمه عليه من شاهد الدم بالقميص

دمه غالي ودم علي الاكبر رخيص وين التحكم حسب وجدانها

* * *

بالبحث نستدل بايات الكتاب واللي يسأل ينتظر رد الجواب

دم كذب چان ابقميصه لو خضاب الآيه صارت للبشر برهانها

* * *

دم كذب واخوته اعترفوا بالصحيح وصارحوا يعكوب بالقول الصريح

الولد حي ليش ابو دموعه تسيح وروحه ملتهبه الجمر اشجانها

* * *

موقف الوالد ويوسف متّضح يدري بي حي لاچن دموعه تسح

اشلون لو شاهده گباله مندبح وجثته ابذاري الترب اچفانها

* * *

خل يجي يعكوب للطف ويشوف علي الاكبر راودت جسمه السيوف
وجتته انقدت ابشفرات الحتوف من قُبُل مو من دُبُر قمصاتها

* * *

انچان يوسف بالسجن فسّر احلام سيف الاكبر بالحرب شرّع احكام
ملك يوسف چان يحكم عالانام ورمح الاكبر يحكم بابدانها

* * *

واللي گص چفوفهن من الجمال خل يشوفن الاكبر شحاوي خصال
مو حواراي گباله مصطفّه رجال ومن خياله اتكوّرت فرسانها

* * *

يوسف بمملكته ما استقبل الاب انتهت من صلبه النبوه لهالسبب
ولجل ابوه الاكبر ابدّمه انخضب وهاي ضنّت أبو اليمه الضانها

* * *

هالبي لو يلقي نظره خاطفه ويأخذ من الاكبر دروس الوفه
اشبه الوادم ابجدّه المصطفه للعقيده ابدّمه خط عنوانها

* * *

جمع من جده الرسول ثلث خصال ورث خلقه وحلقه والفاظ المقال
وحمل من جده علي فنون القتال واكتسب من فاطمه احسانها

* * *

مثل عمّه الحسن بالعز والكرم ومن أبو اليمه درس نهج الشيم
مثل عمه گمر هاشم بالهمم وكسب من زينب درس إيمانها

* * *

گلب زينب ما صبر مثله گلب بعينها شافت الاكبر عالترب
اتغسل ابدّم الشهاده بالحرب والچفن منسوج من كثبانها

* * *

صبرت وما ظهرت دموع وحنين وبمصاب الاكبر تواسي الحسين
وعالحيم ام الحزن دارت العين تواسي ليله المعوله بصيوانها

* * *

اطلعت ليله وشاهدت ام الحزن مثل حن الدلم عالاكبر تحن
چم گلب لفراگ الاكبر ممتحن ويون مثل التون فوگ اغصانها

* * *

چني انظر لبو اليمه من وكف يم الاكبر والوجه منه انخطف
اشلون وكفه والظهر منه انعطف لچن روحه بصير گلبه صانها

* * *

الاكبر اول هاشمي اتكور صريع وبعده جسام التحنه بالنجيع
وعمه العباس والطفل الرضيع وكضت من عدنان كل شجعانها

* * *

وظل أبو السجاد وحده بالطفوف اتها لسمر القنه وبيض السيوف
وجسمه طاح اعلى الثره وزينب تشوف حال اخوها الصاب انسها وجانها

* * *

طهران / ۱۹۸۳ م

ماذا جرى

(موشح)

عيوني تجري وما تحف دموعها نبع من طيرة علي ينبوعها

* * *

عيوني تجري وانفكد منها النظر واسمعت ون الحمام اعلى الشجر
وتت بألحان وانغام الوتر وبالنحب گامت تفسر روعها

* * *

ترقص اعلى الغصن والمدمع يسح مثل ركص الطير لمن يندبح
وأنه يم الشجر گلي منجرح وروحي آلام الزمان تلوعها

* * *

واكدت متنومس ابقي الغصن استمع ون الحمامه من تون
عاشگ النوح ويسليني الحزن ودارس الوته ونغمها ونوعها

* * *

اسمعت ونها وناشدت عن الاسباب جاوبت ما صاب گلبك هالمصاب
گلب ما ادري وردت منچ جواب گالت انشد هالبشر وجموعها

* * *

من عفتها صادفت ام الفصيل ناشدتها ليا سبب دمعچ يسيل
گالت الليله انفكد حامي الدخيل والجواب عرفته من فزوعها

* * *

روحي هامت ناحره جناح الظلام بالمصبيه الليله ماخذها الهيام
مهزعه وتنشد على حال الإمام لمسجد الكوفه اعتنت بهزوعها

* * *

گبل لا اوصل وعيني اتهل دمه اسمعت جبرائيل يهتف بالسمة
طاح بالمحارب حامي الحمه والعقيده انصرعت ابصرونها

* * *

ابطحيته اتهدمت اركان الشرع ومنهج الدين ابمصابه منفعج
والعقيده امست اتهل الدمع عالاصول الثابته وفروعها

* * *

والصلاة تنحب على داحي الباب ونزلت الاملاك تعلن بالمصاب
بالمصيبة انفجعت آيات الكتاب واحنت عليه النبوه ظلوعها

* * *

مبدأ الاسلام يعلن بالثبور وانحمد نور الزهه بجانب الطور
دمعة التورات سالت عالزبور والكنائس خل تطقي شموعها

* * *

راح سر يعلم ابكل الاديان ولبست الكعبه عليه ثوب الاحزان
زمزم دموعه تسيل بلا هوان والحجر الاسود صبح مفجوعها

* * *

عالارض عين السمه نثت دموم والفلك مفجوع وايعزي النجوم
والگمر بغياب أبو الحمله يحوم والشمس غابت ابرج طلوعها

* * *

محنة اليوم اشد من كل المحن هالارض أشرف جسم بيها اندفن
خل يگوم حسين وايعزي الحسن والاعادي خل تذب دروعها

* * *

غاب عنها الجان يسكيها الممة رفر اعلی الكوفه جنح الناييات
عگب حامي الجار ما تسوه الحياة خلها تبدي للفناء خضوعها

* * *

مظلمة الدنيه عگب حامي الجار الثار يهل الثار من ياخذ الثار
بعد ما نعرف الليل من النهار وجفت رياض العمر وربوعها

* * *

طهران / ١٩٨٣ م

الإمام الصادق (عليه السلام)

(موشح)

طاح من غالب عمدها وسورها وانطفت نار الكليم ابطورها

* * *

بالمدينه طاح من غالب عمد والد الكاظم وشبل المعتقد

چان بالمبدأ مثل روح ابجسد وين متدور الكرامه يدورها

* * *

فرع من هاشم وعدنان ومظر ثمر طيب يانع ابدوحة فخر

بعلمه ركن الدين للعليه اعتمر وروحه صبت للعقیده بحورها

* * *

صادق اهل البيت سيفه باللسان بالعلم للدين رافع هالكيان

مثله ما تولد بعد ام الزمان اشما تعد بسنينها وبشهورها

* * *

بسيف علمه جاهد احكام الطغاة ورسم دستور ونهج للتضحيات

وبشباته الما حصل مثله ثبات للكفر هدم عليها قصورها

* * *

وبصموده لينضرب بيه المثل ضمن للاسلام تحقيق الامل

بالمدينه اتصافح وياه الاجل والمنايه عليه تحوم طيورها

* * *

رفرف اعلى الصادق جناح الختوف وشبت بكل كلب نيران اللهوف

وشمس هاشم لبست ثياب الكسوف وغايب اببرج المصايب نورها

* * *

وين هاشم يمته عالظالم تثور اندفنت الهم بالبقيع اربع بدور

يا وسافه منبنت الهم گبور اتساوه ويه الارض مبنه گبورها

* * *

هاذي غير الجالت عليهم الخيل بكرىلا واتخدم من عدهم الخيل

وظلت عيال النبي ابوحشة الليل غابت ابدم الشهاده بدورها

* * *

وين هاشم وين الاكرام الاطياب يمته غاييها يعود من الغياب
ياخذ بثار أبو اليمه والاصحاب وثار اهله السلبوها خدورها

* * *

شمحله من نسمع ظهر ابن الحسن بالمهند يطفى نيران الفتن
بعد ما ييگه يزيد بكل زمن وينتهي شرها وظلمها وجورها

* * *

طهران / ١٩٨٢ م

فاطمة (عليها السلام)

بضعة الهادي سجان رب الخالق السّواها

* * *

زهراء تزهّر من معاني العصمه حلية شفاعه
مصيوغه من جوهر كنوز الحكمه ومعدن الطاعه
كل عالم يبيّن وصفها بعلمه حسب اطلاعه
بضعة الهادي رب الوصف صاغ الوصف وانطاها

* * *

زهراء وصف الخالق ملطفها كنز المعاني
شّماء رسريس المجد والفها ونال الاماني
هالاقحوانه اشما ردت اوصفها يعجز لساني
بضعة الهادي آيه شرف وأهل الشرف تتلاها

* * *

حسناء يرتع من فضلها الاحسان برشف الولايه
ضوعاء تتبهلل كرامه وايمان شمس الهدايه
علياء ذروة مجد فوگ الاكوان للبشر آيه
بضعة الهادي معنى الكمال ازدهر من معناها

* * *

فاطمه ومن ضيها انتشر نور الكون حي هالكرامه
وبهالثرية ازدهر افق المسكون وكشفت ظلامه
كنز المعالي وبيها جوهر مكنون اصل الامامه
بضعة الهادي رب العلا بأوج العلا علاها

* * *

بوجودها الدين انبت اركانه مصدره العقّه
وبالشرف والعزّه ثبت ميزانه ورجحت الكفّه
للهادي تحمل سيرته وعنوانه موصّقه بوصفه
بضعة الهادي مكشوف ذاك الظالم العادها

* * *

بضعة الهادي بكل زمن نسمعها بالهم تناشد
والطاغية اللي ضامها وروعها ظالم وحاقد
بكل يوم باب ام الحسن يدفعها والظلع واحد
بضعة الهادي يا ويله كلمن بالظلم آذاها

* * *

چم حره مثل الزهره صاحت هاليوم وينك يحيدر
وچم ظلع هذا اليوم اصبح مهشوم والچبد يسعر
بهاي البشر چم ظالم وچم مظلوم بفكرک تصوّر
بضعة الهادي چم گلب حن لنوحها وواساها

* * *

ام الحسن شافت مصايب وآلام وفگدک الغالي
وهاي المصايب لو تصب عالايام صارت ليالي
حملت محن كثره من گوم الظلام والدمع هالي
بضعة الهادي حكم الدهر جور وهظم راواها

* * *

خلصت عمرها فاطمه بهالاشجان ليوم المنيه
وزينب الحره استارثت هالاحزان من الزچيه
بهظم اليسر عافت جسوم الوليان فوگ الوطيه
بضعة الهادي بكل مأثم اللي ينصب تلگاها

* * *

دمشق / ١٩٨٠ م

واجداه

يا مسموم يا مسموم
جاهزه ثياب الجفن ونعشك اليوم اندفن
مو مثل الحسين

* * *

ما يحف دمع العين يشبه زمزم
ما ادري المن هالجفن فاض بدم
عالكضه نجبه وچيده ذايب بالسم
لو على الظلع البالخويل اتشم
بهاي المصبيه اظن هيّن مصاب السجن
مو مثل الحسين

* * *

خيّمت يالكاظم عليه الاحزان
ومصائب بكل كلب وجّر نيران
هاليوم جسمك جهزوله الاجفان
مومثل جدك چفنوه بالتربان
يمّا اجت شيعتك واتشيعت جثتك
مو مثل الحسين

* * *

بسم الغدر كلبك يموسى تگطّع
ومجمع الشيعة بالمصايب اتصدّع
يالكاظم ونعشك بهيه تشيع
وجدك ثلث تيام ظل بالمصرع
لمن لفاك الاجل نعشك بهيه النحل
مو مثل الحسين

* * *

يا موسى كلبك ندري ذاب ابسمك

وندرى السلاسل نثفت كل دَمَك
لاچنه راسك ما انفصل عن جسمك
ولا ذبحوا انصارك واهلك يَمَك
راسك وياك اندفن ما طلع ويّه الظعن
مو مثل الحسين

* * *

ياالكاظم ولو گلت بيدي الاصفاد
گبلك انشدت بيها ايد السجاد
ارد انشدك شايف عليل وينگاد
وهم شفت رَضَع تنذبح بالامهاد
يا موسى سجنك سهل ما اندبح بيدك طفل
مو مثل الحسين

* * *

يا موسى من غدروك گوم الاشرار
چانت عيالك آمنه بذاك الدار
وعيال جدك صاريها الما صار
ارد انشدك شايف خيم تلهب نار
ما شفت حرگ الخيم ومسمعت صوت الحرم
مو مثل الحسين

* * *

يا موسى جسمك ما توسد الرمال
ولا الك راس انرفع فوگ العسّال
ولا الك عيله انسبت ويه الجمّال
ولا عفت بالغربه حراير واطفال
اشما صار حالك صعب ما عفت عيله بغرب
مو مثل الحسين

* * *

الرباب (عليها السلام)

آه بيني آه بيني
من شفت خالي المهدي لليسر كلبني استعد
عبد الله بيني

* * *

آنه الرباب اللي عقدت آمالي
وربيت عبد الله بغرس أصالي
روحي تهزّه والمهدي دلالي
وسهم اللي صوّب طفلي غير حالي
سهم اللي حز النحر بدلالي صار الاثر
عبد الله بيني

* * *

عبد الله لو ما ايسيل بالطف دمك
ما چان سال الدمع من جفن امك
يوليدي ظل بكلي مكتوب اسمك
وارسمت فوگ الجفن منظر رسمك
نشقلي جاري الدمع يالمنحر منكطع
عبد الله بيني

* * *

آنه امك الغديتك بجاري دموع
وفوگ المهدي يوليدي أحنيت ظلوع
ما حسبت انظر ويردك مكطوع
بجالك ردت راس امك يظل مرفوع
صوبك ذاك السهم وبكلي صار الالم
عبد الله بيني

* * *

آه بيني يالريتك بدمع العين

ذبيح الليالي الزاهيه صارت وين
حال الرباب أصبح مثل حال حسين
وسهم الكقطع منحرك صارن سهمين
يوليدي گوس الكدر بسهامه گلي انفطر
عبد الله بيني

* * *

ما شايفه عيوني رضيع وينصاب
گيل الفطامه ينفطم بالنشاب
صوابين صارن لا تظن فد صواب
برگبتك واحد واحد بگلي الذاب
والروح متألمه بسهمك وسهم الضمه
عبد الله بيني

* * *

من شفت مهدك خالي يا لب حشاي
ظليت أحن والعايله تحن وياي
ولو ندري بيبك تموت ما رده الماي
جيتك وجبت جروح گلي ويّاي
فگدك يريع الكلب خلاني أحمل غرب
عبد الله بيني

* * *

ما شايفه عيوني رضيع ومذبوح
بس انتة ياللي غابت وياك الروح
هاك اخذ من عيوني دمعي المسفوح
يخبرك بأملك لليسر تالي تروح
امك تروح بيسر وانتة تظل بالكبر
عبد الله بيني

* * *

اشكو لمن

زينب اشعدها يم المشرعه تدري بجفوف أخوها امقطعه
واليتامه امصدعه زينب اشعدها يم المشرعه

* * *

حايره زينب يم كمر عدنان
والكلب لاهب ابجرة الصيوان
شاهدت جسمه والمعاتب حان
نادته يا من لهاشم كمر مو وكت نومه يم شاطي النهر
وما نهض من مصرعه زينب اشعدها يم المشرعه

* * *

ليش يا عباس ما تحاجيني
والدهر من خان بينك وبينني
وسهم البعينك صابني ابعيني
ناظرك لو ما يصيبه السهم بالكلب ما تشب نار الخيم
يا مصاب الفاجعه زينب اشعدها يم المشرعه

* * *

هاك عبتى هاك عالكرم خوفي
وگطعت الجفين گطعت جفوفي
والكفيل أیكون بالعهد يوفي
يا شهم ادري توفي بالعهد لاچن الخانك صواب العمد
وعيلتك متروعه زينب اشعدها يم المشرعه

* * *

أدري ما تخلف يا حليف الزود
عاهدت توفي والعهد مريود
لاچن الخانت ضربة العامود
ابعيني شاهدتك بين حيدرہ جثتك عالترب متوذره
والاوصال امقطعه زينب اشعدها يم المشرعه

* * *

لاح المكدر يا كمر هاشم
انظر الجسمك عالترب نايم
وطاحت الايتام ابولية الظالم
يا سبب منكطع حبل الوصل وانتة تدري الغرب ما ينحمل
اتحشمه ومتروعه زينب اشعدها يم المشرعه

* * *

الشمر لو شمر وزجر يزجرني
چنت أتأمل انتة تحضرني
يا كفيل احماي گوم باصري
عيلتك لو مشت متيسره وبه گوم الطغاة الجايره
والخدر شيرجعه زينب اشعدها يم المشرعه

* * *

والاشد كل حال طببت الكوفه
وعيلتك تمشي ابجالة مجتوفه
والاشد من هاي لجسمك انعوفه
اشلون جسمك يظل فوگ الترب عاجزل تقبل اسلك هالدرب
وعالآبه متطبعه زينب اشعدها يم المشرعه

* * *

طهران / ۱۹۸۱ م

الآمال

يا لاكبر انظر حالي بيبك اعقدت آمالي
غذيتك ايماي العين واذخرتك لاجل حسين
ردتك تضحي گبالي بيبك اعقدت آمالي

* * *

يا سورة الفتح الهبط بيها الروح مجملها وصفك والكمال أبو صفك
منهج السوره ابسيف عزمك مشروح آيتها جفك والعداله ابجفك
وجلمة التكبير الزهت فوگ اللوح والكاف حرفك والكرامه ابجرفك
يالاسمك أشرف آيه نصر العقيدة الغايه
يطلبك منهج مبداك تسجل حروفه من دماك
وبالنصر تتعنالي بيبك اعقدت آمالي

* * *

يا شمعۃ اوجودي التشع بالايماں يا ضمد گلي لو تصوّب گلي
يا جوهرۃ روحي الزهت بالوجدان يا نور دري البيه او جد دري
يا زهرتي التنفح ابروض الشبان يا ثمر حي الروه ابدمعة حي
هاك اخذ صوت أشجاني وفيض الدمع برهاني
ابدمك توفّي المطلوب والنصر بسمك مكتوب
ودمك زكات أعمالي بيبك اعقدت آمالي

* * *

مطلوب من دمك تشرّع مبداك والطلب غالي يالرخصت الغالي
وامك تطلبك يولدي حگ رباك وسهر الليالي احرمت عيني ليالي
توفي الربہ من النحر لو سال دماك ييتشر حالي يا مسرة حالي
تاريخك اليشهد لك سيفك يشرّع عدلك
يا لاكبر ليالي رباك اتصور لي غسلك بدماك
وهز المهّد أوحالي بيبك اعقدت آمالي

* * *

غذاك ثدي الزود يالبيك الزود قدم اشهودك والصدق بشهودك

وابنشأتك للمبدأ انطيت اعهود حانت عهودك يالتوي عهودك
أدريك حر عن سيرة الحق اتذود ضحي ابوجودك والامل بوجودك
هاك اخذ سيفك سيفك وگلّب الحومه ابكيفك
يالراضع ابثدي الزود مرضاعك ايصير اشهود
يالغذتك اصالي بيك اعقدت آمالي

* * *

هاك اخذ سيف المعتقد والايمان هالسيف آيه والنصر بالآيه
هاي المعارك وكت المبارز حان ادرك الغايه والشهاده الغايه
قاعدة كل فارس ابوسط الميدان يحكم ابرايه والنجاح ابرايه
رايك فرع وجدانك اكشف وجه ميدانك
ابوسط الحرب يحله الموت هالفرضه منك لتفوت
لجلك رخصت الغالي بيك اعقدت آمالي

* * *

جاوبها عونج يالتحشميني اليوم ادخل الحومه كون ارجف الحومه
تاريخ إلي ابصفحات حيدر معلوم عندج اعلومه ومتخفاج اعلومه
خل يبشر گلبيچ الضامي المالم اكشف اهمومه ابسيفي كشف همومه
وابصولتي المعروفه أگلّب أطراف الكوفه
خل عينج اليوم اتشوف اشما صفت گبالي صفوف
عهدج يظل ابالي بيك اعقدت آمالي

* * *

ودعها لامه ولاح ظهر الميمون أقسم ابحيدر مختلف عن حيدر
الله وأكبر صاح وارتج الكون كبر الاكبر والنعم لو كبر
كل ساعه وجه الفرس ايغير لون من لون الاصفر صار بالدم أحمر
يللي الحرايب عيدك طبرة العبيدي اتريدك
تعاله من امه الصوت من شافته ابجر الموت
بالصدگتلي ابفالي بيك اعقدت آمالي

* * *

في كل زمان

وين الضماير مُحدّ يناصر
هاي الصرخه ناداها أبو اليمه واحنه اليوم مثله انطالب الامه
وين الضماير مُحدّ يناصر

* * *

خل نتصفح التاريخ ونكشف ناتجه المكتوم
وانشاهد بالوادم چم ظالم وچم مظلوم
من يوم اللذي ناده سبط النبي لهذا اليوم
انكشفت سيرة الوادم ومغزاها صبح معلوم
ما لبّث نداء حسين وظلت عاجزيمه تحوم
وگوم التبعث ابن زياد ما تختلف عن هالگوم
معروفه ابجرامها هتك اعراض سفك دموم
اهل الرذيله عاشت ذليله
حسين يريد للامه ينجيها وهيّه اتعنّت لچتله بمواضيها
وين الضماير مُحدّ يناصر

* * *

سبعين ألف مصطفّه وشهرت للجريمه سيوف
والمعروف منكرهم والمنكر صبح معروف
واليلعب على الحبلين هذا ابكل عصر مكشوف
انحرفت امة الهادي لهالموقف حسين يشوف
گامت تعبد الاشخاص ومدّت للرذيله چفوف
دخلت للحرب ضدّه واصطفت گباله صفوف
ظل صامد أبو اليمه ما يعرف الذل والخوف
خانت البيعه وحكم الشريعة
ظل وحده عگب اخوته وانصاره يستنصر ومن يسمع استنصاره
وين الضماير مُحدّ يناصر

* * *

كبله ضحت انصاره وكل اخوته واولاده
وحده ظل أبو السجاد باصوات الشيم ناده
هل من ناصر ينصر ويطالب استنجاهه
مُحَمَّد لَبَّه للنخوه ومُحَمَّد للوفه داده
حسين امتحن هالوادم واتعنه لاستشهاده
يعلم بيزيد يرید يأخذ ثار اجداده
يطلب من بدر ثارات وهذا الامر ما فاده
انذلت الامه ابجتل أبو اليمه
بهاالصيحه أبو السجاد ناداها لاجن المطامع خانت وياها
وين الضماير مُحَمَّد يناصر

* * *

حسين بكر بلا ضحّه واللي غدرته آلاف
وابدم النحر سجّل هاي السنن والاعراف
واحنه سلكنه منهاجه ومته حملنه هالاوصاف
ما نصبر على الذله ومن حكم الظلم منخاف
شفنه مجتمع ظالم مثل ما أبو اليمه شاف
لا ذمه ولا وجدان لاجن تدّعي اشراف
واتحملنه هالآلام من هالوادم الاجلاف
عافت شرعها ولزمت بدعها
كاموا يتهمونه بتهمه رجعيه واحنه نصيح فكرته حسنيه
وين الضماير مُحَمَّد يناصر

* * *

قائدنه أبو اليمه واحنه امנהجه ماشين
منعوفه ابد للموت دوم احنه الحسينيين
حب حسين مبدئنه واحنه بيه متمسكين
خل اشما يسمونه خل نتسمّه رجعيين
يكفيهم تقدمهم لنار جهنم الطاغين
هالزمره التحاربه ما نعرفها من يا دين

لاهمه مسيح انگول لا همّه مجوسيين
عافت سننها وتبعّت فتنها
ويكل زمن هالطغمه تحاربنه وبنارات أبو سفيان تطلبينه
وين الضماير محّد يناصر

* * *

خل اشما يسمونه اهل الحسد والطغيان
احنه انشرف التاريخ بالمعرفه وبالاحسن
منغير مسيرته ونمشي ابسيرة القرآن
نقدّم درس للعالم بالمكرمه وبالايمان
بالدم ننصر الاسلام وما نتبع هوى الشيطان
نثبت مثل أبو اليمه وندحر جيش أبو سفيان
باسم حسين رايتنه خفاگه ايمدى الازمان
نبذل جهده ومنتبع رشدنه
بيوم الشدد للناس امتحنها وية الظلم والاطماع شفنها
وين الضماير محّد يناصر

* * *

طهران / ۱۹۸۲ م

يا باب الحوائج

يا كاظم الغيظ الكلب مل الصبر
هارون بعده بالحكم شنهو العذر

* * *

يا تاسع اهل العصمه يا روح الوفه
من يوم فكدك صحنه عالدنيه العفه
گوس الدهر بسهامه لسا ما اكتفنه
بين الطهر واهل المكر تدري شكثر

* * *

تصوبنه من الظالم بسهم الشدد
وچيدي مثل چبدك يسموم امرد
لليوم ما شفنه الفرخ صحنه شبعد
شنهو الامر صار العمر مد وجزر

* * *

يا سابع اليمه وينيراس الشيم
گلي جزع من النوايب والالم
والطاغيه سدد علينه شچم سهم
ومن الغدر شفنه العسر وين اليسر

* * *

حگه الكلب من يشن غارات العتب
وهاظالم بمصحف المعبود انكتب
بآية الحق)تبت يدى أبي لهب)
واهل الكفر كسرو كسر ما ينجبر

* * *

شبان عدنه وبالسجون ملوعه
وچبودهم مثلك يموسى مگطّعه
يالكاظم وهارون ظلمه شيجرعه

ما تم صبر تدري الهجر مثل الجمر

* * *

جمرة مصابك بيها مستعره المهج
يالنورك بدوحة ضمايرنه ابتهج
نتامل من الباري ساعات الفرج
وطاغي العصر يوم النصر حتماً يفر

* * *

تحمّلنه من الدهر آلام ومحن
موجود هارون الرشيد بكل زمن
يا يوم يخمد جمر نيران الفتن
ما نبشّر الله تطر شمس الفجر

* * *

يا يوم نسمع ظهر شبل العسكري
وينبجح دلالي ويطيّب خاطري
من الكعبه مسرع يعتني لارض الغري
نعم الذخر وجهه يسر مثل البدر

* * *

ويعتني من وادي الغري لطف كربله
ثلث مائه وثلاثه وعشر فارس اله
ينادون يا ثارات ابن عقد الوله
الصوت ابهدر فوگ الشكر من كل كتر

* * *

شبلك يموسى يطالب بثار السلف
وبصارمه يميّز الدر من الصدف
وياخذ بثار حسين وينول الهدف
وگوم الكفر ضده تجر بيض وسمر

* * *

من كربلا يعتني لكبرك ممتحن

وَيَصِيحُ يَا جَدِي فَجَعَ كَلْبِي الْحَزْنَ
أَنْتَ بَسَجْنَ وَأَنَّهُ بَسَجْنَ نَفْسَ السَّجْنَ
يَا كَاطِمَ الْغَيْظِ الْكَلْبِ مَلِ الصَّبْرِ

* * *

طهران / ١٩٨١ م

الأصول الخمسة

ابدينك تمسك والنجاح ابسعيك
ما ينفعك غير الصبر والإيمان والنجاح ابسعيك

* * *

الباري وضع خمسة لأصول الإسلام تثبته بأصوله
هاخمسه مجمع للسنن والأحكام شارحهن رسوله
محملها اعمل خير واترك الآثام والجفت مسئوله
ادرس اصولك والنجاح ابسعيك
هاخمسه مستوحات من القرآن والنجاح ابسعيك

* * *

أول أصل من هالأصول التوحيد للراد الهدايه
(قل هو الله أحد)صارت تأكيد لليدرس الآيه
عن سورة الاخلاص بالك لتعيد خسرانك الغايه
وحد الباري والنجاح ابسعيك
وانظر القدرة ربك ابكل امعان والنجاح ابسعيك

* * *

واصل النبوه الجمع شمل الامه بالهادي ارتباطه
هالأصل زاهر من سناء العصمه وبالحق اختلاطه
والاسلمت للهادي تتبع حكمه تلتزم بأسباطه
اتبع رسولك والنجاح ابسعيك
وادرس حياة الهادي مغزاها شجان والنجاح ابسعيك

* * *

وأصل الامامه ابتداء منه الترجيح للرايد الذروه
لو ردت شرح الاصل تلگه التوضيح امستمسك العروه
أصل الامامه اعليه تم التشريح من بيت النبوه
الحق اييمينك والنجاح ابسعيك
من آية التبليغ اخذ البرهان والنجاح ابسعيك

* * *

وأصل العدل كل التمسك بي فاز بالعدل من يحكم
لمن ينصبونك حكم لا تنحاز بالحكم لا تظلم
صير ابكلامك واقعي بلا أَلغاز والبراوغ يندم
اقسط ابحكمك والنجاح ابسعيك
والباري وصانه القسط بالميزان والنجاح ابسعيك

* * *

خامس أصل من هالاصول الآخر ميعاد القيامة
كل بشر من خير الاعمال شذاخر يلگاهن جدّامه
واليمشي عالجلين ثعلب ماکر بجهنم مقامه
ادرك مصيرك والنجاح ابسعيك
اتصور المحشر وانه واكف حيران والنجاح ابسعيك

* * *

هول الحشر لو ردت تخلص منه وتتحسن أهوالك
لوذ ابشرف سيد شباب الجنة شد حبل اتصالك
آخره ودنيه بمالشرف تتهنه وتتنزه أعمالك
واذكر امصابه والنجاح ابسعيك
كل دمه عالمظلوم تطفي النيران والنجاح ابسعيك

* * *

ياالمؤمن اذكر سيد أهل الإيمان واتصور الحاله
من جمع ربات الخدر بالصيوان واودع عياله
وجبدته استعرت من حنين الرضعان وانفطر دلالة
نادّته ارشد والنجاح ابسعيك
تضمّد گلبنه ابگطع گلب العدوان والنجاح ابسعيك

* * *

زينب تنادي وتشد للسيف أنجاد يا رمز الحميه
انته العليک اليوم توفي الميعاد وعيالك عليه
فرحت گلبيه وراح يم السجاد يعرضله الوصيه

يوليدي اصبر والنجاح ابسعيك
وزينب تلم عيلتي البحرگ الصيوان والنجاح ابسعيك

* * *

دمشق / ١٩٨٠ م

الحسن العسكري (عليه السلام)

دمع الأصول يفيض بعين الشهاده
أمسه الحسن مسموم وهذا العهد مرسوم
بعين الشهاده

* * *

للهادي رب الكون جاعل أسباط بيها الشفاعه
سيرة المؤمن من قبل ما يحتاط بيدي الاطاعه
والما رصد مبدأها بالاستنباط يعلن ضياعه
حب اثنعش معصوم أشرف عباده
مبدأها كشف هموم وهذا العهد مرسوم
بعين الشهاده

* * *

أهل النُهي تعرج على الاستقراء وتكشف بيانه
وتبحث على جوهر كنوز العلياء وتكسب ضمانه
كنزين مكنوزه بارض سامراء شمس الديانه
حدّث عن الكنزين وابني استناده
وحب الكلب مفهوم وهذا العهد مرسوم
بعين الشهاده

* * *

بسيرة الهادي أشرقت شمس الدين ابهجة أنواره
استارث علومه من الائمه الماضين وظهرت أسراره
أقره بأمالى الطوسي هذا التعيين يصدّق اخباره
شرح الاماليات بيها استفاده
للهادي بيها علوم وهذا العهد مرسوم
بعين الشهاده

* * *

ودستور شرع الحسن يسطع أنوار للفكر واني

منهاجه متقلد بحلية أسرار من بحر صافي
عن هالجواهر لو تريد الاخبار أدرس الكافي
اليدرس علوم الدين يقوه اعتقاده
ودرب الجهل مشوؤم وهذا العهد مرسوم
بعين الشهادة

* * *

بشرع الحسن ظهرت معاجز وآيات والدهر شاهد
وأسراره من نهج السلف مستوحاة ومبدأها واحد
وبهالامور الرايد يصقّي الذات يدرس عقايد
بادئة كل احسان سيرة رشادة
بنهج ثنّش معصوم وهذا العهد مرسوم
بعين الشهادة

* * *

جناح الشهادة يرفرف اعلى التكوين يعزّي نظامه
وعن سمة الامه غربت شمس الدين وعسعس ظلامه
وأضحوا دعاة المعتقد مفجوعين بأصل الامامه
والحسن هذا اليوم تمم جهاده
من سيرة المظلوم هذا العهد مرسوم
بعين الشهادة

* * *

من بني العباس انوجد هالخذلان أصل الظلاله
المتوكل العباسي يشبه مروان بصفحة أعماله
واليوم بالسّم غدر روح القرآن وجبد الرساله
المتوكل اعلى الزيف چان اعتماده
وانكشف هذا اليوم وهذا العهد مرسوم
بعين الشهادة

* * *

الغريبة

(عگيلي)

زينب يحسين اتلگاها ردت وعيالك وياها

* * *

هاي اختك زينب شاهدها وچتالك عنك مبعدها

اگعد يحسين وناشدها عنها وعن حال يتاماها

* * *

هاي اختك زينب تدريها للشام الكوم ميسريها

ويچم ديوان موگفيها وچم طاغي وشامت حاچاها

* * *

من الطف طلعت مغصوبه وايديها بدمك مخضوبه

متكفله العيله المسلوبه ومثلك لعيالك ترعاها

* * *

طبت للكوفه بيا حاله من جور وزجر الجماله

شاهدها ابن زياد گباله وبايده لراسك راواها

* * *

وابچتلك متشمت بيها وابغلظه وشتم يحاچيها

ما سيطر بلسانه عليها ولا فجّر دمعة عينها

* * *

اشما ظل يتغطرس ما سيطر واحلامه اتخارت واتدهور

تالي بضعنك للشام آمر وانوّت للكوفه بمسراها

* * *

للشام عيالك ودّوها جاروا بالمسره وضهدوها

ما حصلوا غايه الرادوها وزينب اعيّاهم ملگاها

* * *

بالجلس وگفت منتقمه لا مرعوبه ولا مهتمه

من يزيد وجوره وظلمه او وصلت غايتها ومغزاها

* * *

والطاغي اتحارت احكامه وخابت آماله واحلامه
اشما زاد ابظلمه واجرامه لثورتكم ما سد مجراها

* * *

وزينب ردتلك منتصره بالحال اعلم انته وأدره
گوم ونشّف منها العبره نالت منواك ومنواها

* * *

كربلاء المقدسة / ١٩٧٨ م

الانتظار

(عگيلي)

الغايب لو عاد من غيابه كل حگ ويرجع لأصحابه

* * *

ها ها يا لمتغيّر لونك إصبر كف دمعات إعيونك
ساعه وتوگفله المديونك وابدقه اتصقيله احسابه

* * *

يا لمغبون إصبر لا تجزع وأبأمرک حکم واتورّع
شمس الغابت لا بد تطلع واتشوف الگوم النهابه

* * *

هالشمس اعله المؤمن رحمه وللمهموم اتروّح همّه
واعله الجاحد تصبح نقمه والگلب الظالم ريتابه

* * *

والظالم مكشوفه أطباعه يتغير كل ساعه وساعه
ملعونه الذات الطمّاعه وصاحبها انكشفت أنسابه

* * *

والابن اللّي يطلع جاحد اعرف هالسر من الوالد
والثعلب لو راد ايعاند ما يخدع سلطان الغابه

* * *

يا لثعلب لا تطغه بأمرک کل الوادم عرفت مکرك
غدار ومستأصل غدرك واليوم انكشفت اسبابه

* * *

ما فادک مکرك ما فادک لو دگت ساعه ميعادک
ما تگدر تخدع صيادک لوحط ابگوسه النشابه

* * *

واشلون الماکر يخدعنه واحنه المتعین قائدنه
غايب نترجاه يحضرنه وايلم اجروح المنصابه

* * *

وسلطان الجاير يتحاكم ابحكمة المهدي ويتغرم
كل غطره السالت من الدم وايرد كل دين الطلابه

* * *

دمشق / ١٩٨٠ م

عز علينا فراقك

ظلت يا علي زينب غريبه بهالليله الرهيبه
وتسعر بالكلب نار المصبيه

* * *

اجت زينب لبوها والدموع تسيح تعرضله أمرها
من جرح الكلب صوت العقيله يصيح واتقطع كلبها
نوب اتكوم من عالارض نوب تطيح ما تندل دربها
مختاره العقيله ومتصوبه الليله
تصرخ والكلب شاجر لهيبه

* * *

للمرتضى اتعنت والدمع مسفوح وتخطبه بعبره
تكله ليش جسمك عالترب مطروح ويراسك الطبره
كوم اتوسد بروحي وفرشت الروح يمك على الغبره
بدلاي أچفنك وبروحي أدفنك
محبوب ودفن جثة حبيبته

* * *

تهل دموع وتنادي يحامي الجار يا ليث الحرايب
عگبك يا علي دلالي يلهب نار من جمر المصايب
شيظل بالدار لو فگدت عمدھا الدار تهدمھا النوايب
وآنه نهدم بيتي من حلت رزيتي
وغدرات الدهر لتظن عجيبه

* * *

لو ادري يفيد وينفعك العتاب چان الكلب عاتب
لاچن ادري ما ينفع يداحي الباب هالون والمعاتب
لمن شفت عگبك مظلم المحراب دلالي تلاهب
فگدك هدم حيلي واتوچر دليلي
وهيهات الكلب ييطل نحيه

* * *

عَيَّ لو رحت وياك روحي تروح يا روح العقيله
دلالي شكثر يحمل هظم وجروح بوداعك الليله
والمجروح يعرف علة المجروح شيصمد دليله
صابني الليالي ومضيعة الغالي
ولو راح الذخر يا هو اليحييه

* * *

متوسد ابجدر الموت يا حيدر وعيني عليك تربي
يگولون الصبر ينفع وما اكدر اصبر على عتي
لو بالصخر چان الصخر يتفسر من صبر البگلي
شيحمل هالفجيعة يا ضيعة الضيعة
وانظر شيتك بالدم خضييه

* * *

يحيدر من تظمه لجسمك التريان من يكفل بخدري
جاوبها الج ذاخر گمر عدنان يا زينب ابشري
تگله اشلون لو بي خانت الازمان يا هو اليكفل امري
جاوبها اخبرچ واعتمدي اعلى صبرچ
سهم الفاجعه لگليچ يصييه

* * *

ناداها اخبرچ والخبر مكنون واوصيچ بوصيه
من ارض المدينه لكريلآ تمشون بضعون المنيه
وتشوفين الهواشم لمن يضخون برض الغاضريه
تتسلب أيتامچ وتتوچر خيامچ
وجسوم الاهل بالطف سلييه

* * *

المصيبة العظمى

يا ناس لتلوموني نار ودمع بعيوني
متصله لوعات مصاب من العرش للمحارب
نار ودمع بعيوني

* * *

ما بين ساق العرش وآفاق اللوح
متصله للمحارب جمرات النوح
والمأ بالعلم العلوي بلا روح
اشرح الحاله بجمر دمعي المسفوح
واعرض بيان احزاني للعالم الإنساني
چم گلب وپایه ذاب من العرش للمحارب
نار ودمع بعيوني

* * *

گلب النبوه الليله دامي ومصيوب
چم گلب وپه الهادي بالوعه يذوب
آدم وشيت وسليمان وأيوب
وفراگ يوسف رد لفاه ليعگوب
الليله الرسل بالكوفه لحيدر تريد تشوفه
نزلت تضمند لصواب من العرش للمحارب
نار ودمع بعيوني

* * *

مفجوعه هالليله السور والآيات
والمصحف امسه بين لوعه وآهات
ودمع الزبور اتفايض اعلى التورات
وسالت من الانجيل نفس العبرات
والدين عينه ربيّه يشكي بفگد راعيه
لمن وگع داحي الباب من العرش للمحارب

نار ودمع بعيوني

* * *

من هاخطب ما شفت أجلّ وأفضع
جبريل بالعالم العلوي اتصدع
وميكال كلبه بهالمصاب اتقطع
وعبرات فطرس مثل عبرة صعصع
وامسه بحزن اسرافيل خل تفرح اصحاب الفيل
للمعتقد كوكب غاب من العرش للمحارب

نار ودمع بعيوني

* * *

بآفاق مكة النايه تتجسم
لاجن عيون الكعبه فاضت من دم
والصفى والمروى اتصل بيها الهم
بعين الحجر الأسود تفايض زمزم
وركن الديانه اتخضب ابدملك يجاتل مرحب
واتصوب الدين صواب من العرش للمحارب

نار ودمع بعيوني

* * *

ارض وسمه اليوم الحزن غطاها
واهل الكفر نامت رغد عيناها
وزينب ابصوت النايه اسمعناها
يا حيدر تنادي وهتفنه وياها
يا حيدر اخذ عتاي من جمر دمع مصايي
واليعتب يريد جواب من العرش للمحارب

نار ودمع بعيوني

* * *

صرخة عتب صرخة دموع واحزان
يا علي انت اللي حضرته لسلمان

لارض المدائن جهزته الاجفان
ما تدري بحسين انصرع عالتربان
عالبغره جسم المظلوم متغسل ابفيض دموم
واتجفن بذاري تراب من العرش للمحراب
نار ودمع بعيوني

* * *

طهران / ١٩٨١ م

إخوان الشهادة

عيال أبو اليمه بخيمة العصمه
وصاح ابن ظاهر بيمه وحشم انصاره

* * *

موقف نشوفه بكرىلا الليله
بخيمة المظلوم انجمعت العيله
وابو اليمه الموت صار ييديله
شاهد الاصحاب مقدمين رگاب
وصاحوا بصوت الشهاده خل نشن غاره

* * *

حسين بخيامه يستمع هالصوت
لن حبيب يصيح ما يهمنه الموت
هاذي فرصته وما نخلها تفوت
وهذا جيش زياد ضد أبو السجاد
لو يخيرونه الاعادي الموت نختاره

* * *

اليوم ابن ظاهر ناشر الرايه
وصاح يا عابس ادرك الغايه
خل نمد رگاب ونحرس الثايه
شوفوا هذي الخيل محجله بتحجيل
وهذا أبو اليمه عليه شابح انظاره

* * *

لن زهير يصيح يخوتي الانصار
من بدر هالگوم مطالبه بالثار
ولو نعوف حسين عليه يصبح عار
گوموا فد گومه ندخل الحومه
وهذا ميدان الحرايب خل نشب ناره

* * *

انجمعوا وراحوا لخيمة المظلوم
وللشهم نادوه هالامر محتوم
هالحرايب سوگ والاسعار دموم
والجهاد يريد للامجاد نعيد
وندري جيمان آل اميه جيوشه جراره

* * *

لن أبو اليمه صاح يالاطياب
احنه نتقدم ونفتدي لركاب
جاوبه عابس ترفض الاصحاب
نريد نتقدم نفتدي بالدم
وما نخلي هالفواطم تبگه محتاره

* * *

اخذوا الرخصة ودخلوا الميدان
جرّدوا السيوف وذلّوا العدوان
استشهدوا للدين وسجلوا عنوان
بروض السعاده تحله الشهاده
والخلود بمالشهاده ضربوا استاره

* * *

طهران / ١٩٨٣ م

مَنْ المَعِين؟

تودعنه ييو اليمه
يا هو اليكفل عيالك ويا هو اليحرس أطفالك
تودعنه ييو اليمه

* * *

ييو اليمه حله التوديع گوم او ودّع العيله
حرم تنتظر وداعك وهاليله أشد ليله
رياب وسكنه وام كلثوم ورملة وزينب وليله
يصيحن صوت ييو اليمه
لمن تكرب آجالك يا هو اليحرس أطفالك
تودعنه ييو اليمه

* * *

ييو اليمه ظلام وخوف خيمن فوگ المخيم
حرم ظلينه يا مظلوم ونجري الدمع ويه الدم
زمان الشوم يفارگنه وندري الشمل ما يلتم
دمع وفراگ ييو اليمه
لمن يسفر هالالك يا هو اليحرس أطفالك
تودعنه ييو اليمه

* * *

نشوف اليوم يا مظلوم خدر العايله مرتّب
وباچر لمن تضحون هذا الخدر يتسلب
تظل أيتامك بحيره ونار مخيمك تلهب
جمر وآلام ييو اليمه
وجف الدهر لو نالك يا هو اليحرس أطفالك
تودعنه ييو اليمه

* * *

يخويه حسين أشد كل حال لو شفته الحجر صابك

يسيل الدم على شيبك وتسعر جمرة مصابك
وسهم المثلث يصيبك ابجبدك والدمه خضابك

بالمثلث ييو اليمه

من ينگطع دلالك يا هو اليحرس أطفالك

تودعنه ييو اليمه

* * *

على التربان بالحومه توگع من ظهر مهرك

وشمر يتعنه للمصرع ويتربع على صدرك

يخضب وجهك بدمك وبسيفه يحز نحرک

واشد كل حال ييو اليمه

من يولينه چتالك يا هو اليحرس أطفالك

تودعنه ييو اليمه

* * *

حرم واطفال بين امي تظل بمصرعك يّمك

ونشوف الخيل بالميدان بالحافر ترض جسمك

يجقّن جسمك الذاري ويغسل جثتك دمك

يگطعونك ييو اليمه

ومن تتوسد رمالك يا هو اليحرس أطفالك

تودعنه ييو اليمه

* * *

عگب عينك نشوف النار وسط مخيمك تسعر

ويداهمنه هجوم الخيل ويصدّع گلب هالخدّر

حرم ما تعرف الذلّه وتالي بغصب تتيسر

عگب چتلك ييو اليمه

يا هو اليحدي برحالك يا هو اليحرس أطفالك

تودعنه ييو اليمه

* * *

على التربان من تطيح ويرد المهر خالي

أنشف بالصبر دمعي وأهياً للسبي عيالي
وعكب هيبة گمر عدنان يحدّي الشمر برحالي
وأنادي عليك ييو اليمه
صوت الحزن ييرالك يا هو اليحرس أطفالك
تودعنه ييو اليمه
* * *

طهران / ١٩٨٣ م

زفاف المنايا

يا روعي يجسام خانت بيبك الايام
ياالضحيت دمك لاجل الاسلام خانت بيبك الايام

* * *

يا نسمة الهبت من الجروح برياض السعاده
يا غصن الحسن لاهل الوفه تفوح يا ساعد وداده
يا شاب العلى التربان مذبوح بحجور الشهاده
يوليدي يعريس يا نسمة السريس
يا جفن الغفت برموشه الاحلام خانت بيبك الايام

* * *

يعريس الشهاده بالالحرب صار ابدال الحنه دمك
يالسجلت بالطف اعظم ادوار من ناصرت عمك
بفراگك دليلي يسعر بنار واسمع صرخة امك
بعد شيصبر الروح عليك الكلب مجروح
المنيه خطفتك من بين الخيام خانت بيبك الايام

* * *

يريع الجبد شيصبر المفجوع من جور المصابب
امل گلي مثل منحرك مگطوع بسيوف النوايب
اريد اعلگ شموعك بين الظلوع ينبراس الكتائب
بين الحسن النخاك وابعث روعي وياك
بلچن جرح گلي الليله يلتام خانت بيبك الايام

* * *

يجاسم والدك تنذبح وصّاك وتتقدم ضحيه
وبهاي الشهاده غفت عيناك بفراش المنيه
وصاك الحسن تتحنه بدماك لا تنسه الوصيه
وعمك ناده هالصوت خالد تظل متموت
گلي وگلبك وگلب الحسن هام خانت بيبك الايام

* * *

اچفنك بالكلب والچبد لحدك واغسلك من المدمع
گوم من الثره بروحي اوسدك روجي الك مضجع
يريت انگطع چبدي گبل چبدك ولا شوفك مگطع
طفت عيني ولا شوف بدال الشمع السيوف
ونثارك صبح بالمعركه سهام خانت بيك الايام

* * *

گلب امك مثل جسمك المصيوب تصوب بالمصبيه
ما حسبت اشوفك ييني مخضوب والجهه سليبه
عليه بكر بلا هالامر مكتوب اظل بالطف غريبه
گلي من الحزن ذاب وهام اينج المصاب
وهاشم الك نشرت سود العلام خانت بيك الايام

* * *

بين الحسن يالحنة چفوفك صارت دمه الطبره
لو صار اليسر تقبل اشوفك متوسد الغيره
بهذا الحال ييني اشلون اعوفك گلي خلص صبره
اشلون اطلع بالا حزان واعوفك على التربان
وانادي عليك من الكوفه والشام خانت بيك الايام

* * *

طهران / ١٩٨١ م

اين الخدور

يا گمر عدنان من طاحت الرايه
ما ظل خدر للعايله
وحرگوا الصيوان من طاحت الرايه

* * *

زينب اتعنت للنهر مرعوبه
وصاحت ابصرخه ويه الدمع مصحوبه
يا ابا الفضل اختك أنه المهيوبه
وأستار خدري ابرايتك مضروبه
وعگبك يعباس لا خدر لا ثايه
وخدري البنيتة ابكربلا
اتوچر ابنيران من طاحت الرايه

* * *

يا ابا الفضل عالخيم غارت الصفوف
يا ريت عندك نظر سالم واتشوف
ويا ريت ما مگطوعه منك الجفوف
چان الحرم ما حسست ابلوعه وخوف
من غارت الخيل من هجمت عدايه
ظلت اگلوب اموجلہ
وجارت العدوان من طاحت الرايه

* * *

يا ابا الفضل بالخيم ريتك موجود
ويا ريت ما صوبك ذاك العامود
ما چان خيل اعداك داست الحدود
ولا چان خدر الحرم منهن مفگود
راح الخدر راح من راح حمّايه
والحرم ظلت معوله

ومصدر الاحزان من طاحت الرايه

* * *

يا ابا الفضل بالصدر ضاغت الانفاس
هاك اخذ أصوات العتب يا عباس
وانچان عذرك بالعمد صاب الراس
ظلع أبو اليمه ابخافر الخيل انداس
وانتهض من جيت يم جسمه شچايه
وجثته ابدمها امغسله
والچفن تران من طاحت الرايه

* * *

يا ابا الفضل وين العهد أصبح وين
للنخوه ردتك تنتهض مثل حسين
لتگول عذرك بالسهم صاب العين
ولتگول ما عندي يسار ولا يمین
اتعنت هالعیال للنهر ویايه
ومنها المدامع هامله
وزادت الاشجان من طاحت الرايه

* * *

يا ابا الفضل وانه التكفلت حمای
لا تضرن جيتك أشکي من نار اضماي
من الماي جزنه وبعد منريد الماي
لاچن اجيت أرد آخذ الجود وياي
راح أترس الجود ابدمعتي الهمايه
وأروي الغلوب الذابله
وچم گلب عطشان من طاحت الرايه

* * *

چنه الگمر جاوب ابگلبيه الدامي
بهذا العتب لتهيجين آلامي

سهم العتب هالنوب فوگ اسهامي
ما خنت عهدچ خانتیچ آیامي
ما خنت العهد امسجلها بدمایه
لاچن وحگ سید المله
حكم الدهر خان من طاحت الرايه
* * *

طهران / ۱۹۸۳ م

الشهيد الأول

خانت الكوفه عهدها طول الدهر متسجله

خانت الكوفه عهدها

* * *

عند الحمايل منكتب هاالمرسوم

المضيّف بواجب التضييف يقوم

الكوفه بغدرها انفضح سرها المكتوم

غدرت الضيف وغسلته بفيض دموم

هالفعل ناتج حقدّها لحد الوفه ما توصله

خانت الكوفه عهدها

* * *

للكوفه مسلم من وصل عالميعاد

ياخذ عهود البيعه من عدهم راد

ما يدري بيها انصاعت لابن زياد

هالكوم ما تختلف عن الاجداد

واضح بهغشها وحسدها معروفه من قال وبله

خانت الكوفه عهدها

* * *

بعثوا كتبهم والكتب خدّاعه

لحسين صاحوا نبدي أمر الطاعه

ومسلم عرف هاالمجتمع وأوضاعه

والكوفه يدري لياحكم منصاعه

مسلم يخطط رشدها وهيه تريد تقاتله

خانت الكوفه عهدها

* * *

مسلم امتاز بأعتقاده وصبره

أول شهيد أصبح بهاي الثوره

وموقف الثوره لو تريد تنظره
تشاهدها ثوره وعالدهر منتصره
ثوره تمتاز بمجدها بالثوره أول مرحله
خانت الكوفه عهدا

* * *

مسلم شهيد التضحيه والايمان
والموقفه انهدمت عروش الطغيان
وابفيض دمه انكتب نهج القرآن
بالشرف مسلم سجل أعظم عنوان
فكرته الحره عقدها وصبر أبو اليمه يمثله
خانت الكوفه عهدا

* * *

كبال الظلم موقفه السامي تخلد
بثوره حسين أول شهيد استشهاد
وظل اسمه بلسان الدهر يتردد
هاشمي وطيب أصل من أب وجد
هاشم ابنة خلدتها ويسقر گوم الجاهله
خانت الكوفه عهدا

* * *

مسلم غيور وللمظالم ما طاع
وأرموه من قصر الاماره اعلى الكاع
ثاره نأخذ يوم الطفوف وما ضاع
وسيف العقيده للمظالم كطاع
مسلم لهاشم ضمدها تشهد مواقف كربله
خانت الكوفه عهدا

* * *

ساحه الطف أصبحت مصدر الاحزان
من وصل ظعن الحرم ويّه الوليان

وضحّوا أهالي المرجله والایمان
واعلى الحرم غارت خيول العدوان
والخيم طايح عمدھا وصاحت بصوت العايله
خانت الكوفه عهدھا

* * *

طهران / ١٩٨٣ م

أنصار الإمام (عليه السلام)

يا محله هالانصار وكفت بحمه

يم أبو اليمه

ورفرف جناح الموت بالغازيه

* * *

يا محله هالانصار اهل الشهاده

من دخلت الميدان بزود وإرادته

واتنشرت الارواح بروض السعاده

مذخوره للدين وتناصر حسين

رفعوا لوه التوحيد ضد آل اميه

* * *

يا محله من تثور للحك همهم

للشرع والاحكام ضحوا بدمهم

للدله ما يرضون ترفض شيمهم

طاهره المرضع صافيه المنبع

والشرف والاحسان عدهم سجيّه

* * *

يا حله سيف الموت وسط المعاره

يشعل جمر بالكون من يصب ناره

وانصار أبو السجاد شنوا الغاره

ثابت عزمهم ضحوا بدمهم

واتنشرت الاجساد فوق الوطيه

* * *

يا محله من ينشال سيف ابن ظاهر

وعابس حليف الزود بالهمّه ثاير

وناده زهير بصوت وين الضماير

معروفه الانصار بالحرب من صار

الهم امجاد تنور فوگ الثريه

* * *

يا محله بالشدات لو شدوا الحيل
الهم وجوه بدور لو خيم الليل
بالدمه تصوغ حجول واتحجل الخيل
معروفه بالزود والكرم والجود
غسلها جف الموت بدم المنيه

* * *

يا محله من تصيح يرجف المسكون
ولو شتوا الغارات يتصدع الكون
بالحرب لجل الدين عزموا يضحون
شوف الكرامه لجل الامامه
وللمعتقد ارواح تنطي هديه

* * *

ضحت لاجل حسين بالحومه الانصار
الحر الرياحي بزود بالمعركه ثار
ومن صارمه الميدان يتلاهب بنار
ضهضب بزوده واثبت وجوده
من سقر للفردوس راشد النيه

* * *

طهران / ١٩٨٢ م

سوف نسبي

بحال الغرب يحسين شيصبر عيالي
والحرم وين تروح لو شافتك مذبح
وامگطع گبالي

* * *

زينب تعنت والكلب شاجر بهمه يم أبو اليمه
جمعت عيال المصطفه بخيمة العصمه يم أبو اليمه
وتنادي هذا الموقف بعيني أرسمه يم أبو اليمه
واعرض صور احزان من دمعة اطفالي
وييگه الدمع مسفوح لو شافتك مذبح
وامگطع گبالي

* * *

بين أمي گوس الفاجعه نيشن سهامه بعين اليتامه
ودمعة افراگك يا شهم تصبح علامه بعين اليتامه
وجمر المخيم ينظفي ويسعر ضرامه بعين اليتامه
شيأمن الايتام لو فگدت الغالي
وشيضمند المجروح لو شافتك مذبح
وامگطع گبالي

* * *

بين امي لو شفت الجسم منك مگطع بخطة المصرع
ويم جسمك املاك السمه تسجد وترکع بخطة المصرع
للحرب يا رب الحرب هالعيله تطلع بخطة المصرع
وتنادي يا مظلوم خييت آمالي
واليسر الها يلوح لو شافتك مذبح
وامگطع گبالي

* * *

بين امي واعظم فاجعه لو شفت جسمك مغسل بدمك

وترك دليلي اعلى الترب يا خويه يمك مغسل بدمك
مره يقبل منحرك مره يشمك مغسل بدمك
والاشد من هالحال يا ثمر دلالي
ما تظل بختك روح لو شافتك مذبوح
وامگطع گبالي

* * *

بين أمي عگبك احمل سهام المنيه من الغاضريه
واليسر يحسين اليسر يصعب عليه من الغاضريه
يا هو اليصدگ بت علي تطلع سبيه من الغاضريه
والحرم صاحت صوت حالك مثل حالي
وتنصب دار النوح لو شافتك مذبوح
وامگطع گبالي

* * *

وچبد الارامل لا تضن ياخذ قراره وتطلع يساره
واشلون گلب الحرم ما تلتهب ناره وتطلع يساره
من ساحة الطف تنسي لقصر الاماره وتطلع يساره
بالكوفه والشامات من يكفل عيالي
ودرب اليسر مفتوح لو شافتك مذبوح
وامگطع گبالي

* * *

بغداد / ١٩٧٨ م

الصابرة

غاب هلال دنياه ابطيحت الرايه
يا دهر لا تنساني ما يتكر عنواني
اشلون اتخون ويايه ابطيحت الرايه

* * *

يا دهر زينب يا دهر هاك اخذ صوت مصابي واسمع عتابي
يا دهر تذكر كربلا يوم الخنت بأحبابي واسمع عتابي
زينب تراني يا دهر چانت العقه حجابي واسمع عتابي
يوم الجيت من طيبه تذكر الهيبه
ابزود اخوتي الكفلوني والكربلا جابوني
ابذله ارضيت حاشايه ابطيحت الرايه

* * *

يا دهر تعرف يا شهم بالطف نصب صيواني ورافع كياني
بزود أبو فاضل منكتب زودي وشرف عنواني ورافع كياني
أيمانه والف رايته ومتوالف بايماني ورافع كياني
يا غدار بالوالي تذكر دلالي
ولحالي چنت تشوفه من گبل گطع چفوفه
خاب اليوم رجوايه ابطيحت الرايه

* * *

يا دهر دلالي انصدع من شفت جسم الاكبر عالثره موذر
اشبه الوادم بالنبي لاچن ابدمه اتعفر عالثره موذر
طيرة العبدی ابهامته واتغسل من المنحر عالثره موذر
الاكبر طاح بالحومه وفاضت دمومه
وذرتني سيف العبدی خلّه المراه ابچبدی
وليله اتلوذ بحمايه ابطيحت الرايه

* * *

يا دهر چم شاب احرمت وابعرسه ما متهني وخيبت ضني

عريس جاسم حنته ابيض النحر متحني وخيبت ضني
شمعة زفافه ابحيمته طقوها واشتد وني وخيبت ضني
جاسم شاب متنه ابليلة الحنه
لاجن الصوب عيني وخله الهظم يلفيني
لمن جيت شچايه ابطيحت الرايه

* * *

يا دهر تعرف يا سهم خلّه المدامع تجري وحيرني بامري
سهم الكقطع نحر الطفل بالاثر صوب نحري وحيرني بامري
سهم ابن كاهل بالكلب جمراته ظلت تسري حيرني بامري
طفل حسين من سهمه اتخضب ابدمه
لاجن الزيد همي وابجسمي نشف دمي
وخله النار بحشايه ابطيحت الرايه

* * *

يا دهر تعرف يا سهم متمركز بدلاي وغيره لحالي
سهم المثلث يا دهر من كقطع جبذ الوالي وغيره لحالي
چانت الدنيه زاهيم بوجود اخويه الغالي وغيره لحالي
لمن غاب والينه جاروا علينه
لو ما لفت آجاله ما تهجم الخياله
وفزع الخيل عالثايه ابطيحت الرايه

* * *

للكوفه تذكر يا دهر لمن رحت مسبيه من الغاضريه
ضعن الفواطم بالسبي چان الشمر حاديّه من الغاضريه
بجمع اليتامه امحيره وعالشاطي عيني ربيّه من الغاضريه
بالشامات والكوفه لحالي تشوفه
سبيت الذي سابيني والنصر صار لديني
وضعني غاب حدايه ابطيحت الرايه

* * *

لوعة الايام

يحسين جارت أيامي من يوم سلبوا أيتامي
وردت أحسب آلامي من يوم سلبوا أيتامي

* * *

زينب اجت من اليسر يم گبرك
عافتك من يوم اللي گطعوا نحرک
ومن يوم رضوا بالخوافر صدرک
واليوم رجعت يبو اليمه تخبرک
هالناس جاروا عليها وللشام عگبک سايبها
وسهام عدواني ترامي من يوم سلبوا ايتامي

* * *

صاحت بصوت الفاجعه يا مظلوم
اكشف تراب اللحد يحسين وگوم
اختك واجيت من اليسر أشكي هموم
من يوم عفتك عالثره لهذا اليوم
مجروح گلب اختك تدري واليوم اعرضلك امري
وتشوف چبد اختك دامي من يوم سلبوا ايتامي

* * *

لمن طحت يحسين فوگ الغبره
وجتتك بسيوف الكفر متوذره
ناديتك خيام الحرم مستعره
ما جاويتني وگلي ذاب بصبره
والخيل هجمت عالخدر والنار بخيمنه تسعر
وبحشاي نيران خيامي من يوم سلبوا ايتامي

* * *

وليلة الحادي عشر ليلة آلام
بحال الغرب بس الحرم والايتام

متصدّعه وجارت عليها الايام
مساهره وجفن اللي تجرّح مينام
والليل خيم عاليله الله من ذيج الليله
بالحال والمدمع هامى من يوم سلبوا ايتامى

* * *

جهجر عليه الفجر وافجع مصباح
شاهدنه روس أهل الشيم فوگ رماح
وحادي الهزل لليسر عاليله صاح
طلعنه بجسوم وعفنه يمكم الارواح
وتسيل دمعات عيوني والسوط يضرب بمتوني
مرفوع راسك جدّامى من يوم سلبوا ايتامى

* * *

مو هيّنه جسمك ييو اليمه نعوفه
وراسك على روس العوالي نشوفه
وافجع وضع لمن دخلنه الكوفه
شفت اليتامه والحرم مجتوفه
العيال دخلت للمجلس وگبال ظالم متغطرس
مفگود منهن ليحامى من يوم سلبوا ايتامى

* * *

شاهدت ابن زياد وسط الديوان
ونشفت دمعي بالصبر والاحزان
وابخطبتي فجّرت اعظم بركان
وانهدمت عروش الظلم والطغيان
والچان متشمت بينه رديت كل سهم بعينه
وبالزود شدّيت وسامى من يوم سلبوا ايتامى

* * *

بالكوفه عهدك يا شهم وفيناه
والظعن عرّج والمجد سار وياه

وبالشام موقف ثورتك أديناه
وحكم ابن مرجانه بفشل خليناه
بالشام وضّحنه الفكره وهناك كملنه الثوره
بايمان حققت احلامي من يوم سلبوا ايتامي

* * *

بالنصر لارض الشام غادرناها
وگوم آل اميه بفشل خليناها
عيالك اجتي وروس أهلها وياها
انفض ييو السجاد واتلگاهها
من الشام ردت يم گبرک وترید یحسین اتخبرک
لليوم گلب اختك ضامي من يوم سلبوا ايتامي

* * *

طهران / ۱۹۸۳ م

الفراصة الحسنية

(سريع)

جسام لَوَّحَ ظهر ام العله وبصارمه انشالت أرض كربله

* * *

جاسم لنيران الحرب شائها روس الاعادي بصارمه شائها

والجده حيدر بالوغه شائها لتاريخ جده بالهمم سجّله

* * *

بجفّه حسام المعتقد سالمه وعين امه نامت بالخدر سالمه
من صولته جفن الحرب سالمه ومن حملته كلوب العده موجله

* * *

مرهف يقينه من رهيفه أحد كطّاع ما يوصل لحده أحد
ساحة الطف سواها غزوة أحد برمه وبسيفه للحرب عادله

* * *

من كل وصف جسام اسمه وأجل لمن برز وياّه لاح الاجل
صاحت اميه ريت جاسم أجل حملته وريت لمهره متخيّله

* * *

صاحت اميه وصوت الها دوه شبيل الحسن سلها وتدور دوه
وجمر الغضه بوسط الحرايب دوه من حيث جاسم بالرمح شاعله

* * *

كلب الحرب من جمر سيفه يصل محمّد كدر يم ابن حيدر يصل
نادته رمله من المخيّم يصل يا سام سيفك خل يذب هلله

* * *

جاوبها يا رمله الوكت حان الي أدريچ كلبچ بالخزن حان إلي
معرس وردت بهالعرس حان الي وحنّي صارت من دمه المرجله
بالصبر لمتون النوايب أرض أتمنه دمي يسيل فوگ الأرض
بس كون يا رمله لدليلچ أرض والولد بالحومه يمثّل هله
مثّل أجداده ومختلف عنها وكلوب اميه حسّت بعنّها

والخيل گامت تعثر بعثها واطرافها بموج الدمه محجله

* * *

طهران / ١٩٨٣ م

النعي، الأبودية، الموال

النعي

عن لسان حال العقيله زينب (عليها السلام)
زينب واخبرك من كلب ولهان واصيح بصوت تسمعي يدفان
اخويه حسين مات بغرب عطشان كبل متذب على جسمه الترابان
صب ماي اعلى جبده اليشب نيران وگله عالحرم حركوا الصيوان
وزينب طاحت بولية العدوان بيبكم هالأمل يحسين ما چان

* * *

يا هلي ما تقبل شيمكم بالغرب تتسلّب حرمكم
لو بيدي اگضي العمر يمكم بيا بحر غرگانه هممكم
لو اگدر بگلي اضمكم وراسي اخضبه بفيض دمكم
حرمه الدهر وسفه وحرمكم

* * *

عن لسان حال الهاشميات
نرجاك يا حادي الطعینه مر على جسوم الاهل بينه
ودلينه جسم حسين وینه ونخّره بالجره علينه
ونگله متيسره سكينه بلچن يگوم ويحامينه
من گوم اميه ينجينه وگلب الحرم يگطع ونيه
والينه ما يدري انسبينه لو يدري ما ظن يخلينه
نمشي بيسر بين اعادينه وگوم آل اميه تبارينه
هذا الجرّه من عگب عينه

* * *

الحسن بن علي (عليه السلام)
سالت عيوني دموع ودموم والجمر حدر الظلع مظروم
برض المدينه مهجتي تحوم ودلالي بالفاجعه مالوم
راح أبو مُجّد راح مسموم وشجّروا نعشه بنبل هالگوم
هاليوم يوم النايه اليوم يوم المصايب يوم الهموم
جفن الهواشم فارگ النوم للمرتضى ما وصلته علوم

ما يدري جبد الحسن مخذوم

* * *

يا كمر هاشم شوف حالي منهدم سور الجان عالي
من عكبك تيسرت عيالي وانفكد برض الطف دلالي
وامدوهنه بعالم خيالي وابغييتك هذا الجراي
متمحنه بحيرة اطفالي يم النهر غرب هالالي
وانهدمت بيوت المعالي وتلبدت سود الليالي
وابطيحتك خابت آمالي

* * *

إلى صاحب الأمر الحجة ابن الحسن (عليه السلام)
مصيوب وايعاتب المصيوب وينك يمن عن عيني محبوب
من غييتك ذابت الكلوب چم دوب نحل صبر چم دوب
هالامر بين الحسن مكتوب نحل هظم والدمع مسچوب
والمثل بينه صبح مضروب والفلك بينه يدور مكلوب
اشحال الذي يفارگ المحبوب

* * *

الأبودية في المباراة

أفاطُم لو خلتِ الحَسينَ مُجدلاً وقد ماتَ عطشاناً بشطِّ فراتِ
الفرات انكُطعَ منه العذب يوفاه
شسبب ما رَوّه جُبد حَسين يوفاه
التهب يا فاطمه من العش يوفاه
وبكتره الفرّات يسيل مِيّه

* * *

اليومُ نامت أعيُنُ بكْ لم تَنَم وتسهدت أخرى فعزّ منامُها
تدري شعمل يا عباسْ بعداك
كسر ظهري وأنه المختار بعداك
نامت رغد عين الكوم بعداك
ومساهره عيون الفاطميه
خَضِبُوا وما شائبوا وكانَ خِضابُهم بدمٍ من الاوداج لا الحناء
مثل حن الورگ زينب حناها
مصاب الاكبر وجاسم حناها
تشوف بدور برض الطف حناها
خضاب الدمه وزفتها المنيه

* * *

صلّت على جسمِ الحَسينِ سيوفهم فغدى لصالية الضبي محرابا
ابمهجتي الناييه جالت وصلّت
على اللي جبدته التهبت وصلّت
لجسمه البيض ركعتله وصلّت
وغده محراب لسيوف آل اميه

* * *

ضمّان ذابَ فؤاده من غلةٍ لو مسّت الصخر الأصم لذابا
صبرت اعلى الدهر يا صاح ونيار
لچن گلي على المظلوم ونيار

ضامي وجبده من العطش ونيار
وتهد صم الصخر ناره السريه

* * *

فمتى نلطم بالبيض الصفاح أوجهاً قد جدّعت منّا الأنوف
يصفوة هاشم وبرعم نسلها
ظلوع امك أظن فكدك نسلها
يمته سيوف عزّته نسلها
ونغمدها بأنوف الجاهليه

* * *

لبسوا القلوب على الدروع وأقبلوا يتهافتون على ذهاب الأنفس
للخالق انصار حسين وحدّوا
عن الدين ما أصفحوا وحدوا
لبسوا عالدروع كلوب وحدوا
بظعن الموت وانوو للمنيه

* * *

أيسوقها زجرٌ بضرب متونها والشمّر يحدوها بسبّ أبيها
ييو السجاد هالخدّر متنها
يظل زجر وثمر يضرب متنها
كبالك تنشتم وانه متنها
غريبه يا غريب الغاضريه

* * *

عجباً لها بالأمس أنت تصونها واليوم آل أمية تبديها
زجر بالسوط عالخره يراها
وجفنها من دمه المدمع يراها
چانت بالخدّر محّد يراها
واليوم اصبحت بين آل اميه

* * *

مالي دعوتُ فلا تحيبُ ولم تكن عودنّي من قبل ذاك صدودا

دليلي اشما يون تدري وناليك
زماي خطفك من ايدي وناليك
شنهو السبب بين امي وناليك
أنادي وما ترد جواب إليه

* * *

في بأس حمزة في شجاعة حيدر بابا الحسين وفي مهابة أحمد
حمل الأكبر ولعياله وصفهم
هجم وعداه شتتهم وصفهم
جمع من حيدر وحمزه وصفهم
وبخلقه ورث سيد البريه

* * *

فلتذهب الدنيا على الدنيا العفا ما بعد يومك من زمان أرغد
يا هو اللي يسلي الكلب يومل
ويا هو اللي يباري العيس يومل
على الدنيه العفه ناديت يومل
طحت من عالمهر فوك الوطيه

* * *

ابوذيات متفرقة

مصيبتكم يشبل الحسن ياليت وعلى جدك خيول الكوم ياليت
ردتك حاضر بكربلا ياليت وتنظر عمّتك بين آل اميه

* * *

الدهر بالكلب لسهامه عيّنها وچبدتي مصاب أبو اليمه عيّنها
السميّه بدارها العامر عيّنها وزينب باليسر راحت سبيه

* * *

أدمن للكلب يحسين يرحين وبس الهن دموع العين يرحين
خواتك لليسر عاهزل يرحين ويعوفن جثتك بالغازيه

* * *

مرت عالعقيه ايام شامات يسيره وشاهدتها عيون شامات
تنسه الكوفه لو محنة الشامات لو تنسه ضحايه الغاضريه

* * *

انسلب عكلي يهالغايب ونبهاي أهّي غيبه ويمته تفض ونبهاي
يگولون الصبر طيّب ونبهاي أگول الصبر من طعم المنيه

* * *

الموال

يبين الحسن بالعتب طول العمر بسّهم
ما ضغت من الدهر طعم الفرح بسّهم
خل نرشد لكربلا يكفي الدمع بسّهم
ودموم جدك تهب نسمات هاشمها
حافر خيول العده لظلوعه هاشمها
وانچان ثاره انسه يا فرع هاشمها
گوم اطلب بثار طفله المنفطم بسّهم

* * *

مجدك ييو حسين عالدينه تعالى وسمه
يا حجة الله يا مالك علومه وسمه
اشما رادت الناس تتباها وتشد اوسمه
بس ليك الكلوب يا قبلة نظرها ترب
وكلوينه الواله برياض حبك ترب
ما من جدال أیحصل هالناس كلها ترب
وانت الذهب يا علي وللكون شخصك سمه

* * *

هلال العمر سيدي يحسين ما تملك
والروح من الحزن للصبر ما تملك
وبكل كلب يا شهم منصوب ما تملك
ودموعي ويه الدمه فوگ الحدود مصاب
مثلک دليلي بسهم جور الزمان مصاب
ومصائبك بكربلا أصبح مصاب مصاب
يا من اخوان واهل وانصار ما تملك

* * *

يا من ليالي الهنه بأيامه تاليها
آيات حبك لساني بشوگ تاليها

نسمه وداډك تهب والعشك تاليها
وذكراك بمخيلت افكاري شيّدت دار
وينبوع حبك وسط گلبي اليودك دار
يحسين طال الهجر والفلك بينه دار
خل نصبر نشوف تصفي اشلون تاليها

* * *

الفهرس

٢	مقدمة
٤	في قصائد الكعدة
٥	قم يا أبي
٨	طريق الشهادة
١١	المواعظ
١٥	يوم الكفاح
١٩	هتاف الأحرار
٢٢	يا شبيه المصطفى
٢٦	لمن الشموع
٢٩	نداء الكفيل
٣٢	ابناء علي (عليه السلام)
٣٥	النبراس
٣٩	لماذا قتلوه
٤٢	الحوار المؤلم
٤٦	كيف ترضى
٥٠	راية الحمد
٥٤	النبي ايوب (عليه السلام)
٥٧	في قصائد اللطم
٥٨	يا غيره الله
٦٠	العليلة
٦٢	القرآن الناطق
٦٤	الأماجد
٦٧	الفراق
٦٩	يا ابا الفضل

٧١	فجعت قلبي
٧٣	يوسف الصديق
٧٦	ماذا جرى
٧٨	الإمام الصادق (عليه السلام)
٨٠	فاطمة (عليها السلام)
٨٢	وا جداه
٨٥	الرباب (عليها السلام)
٨٨	اشكو لمن
٩٠	الآمال
٩٣	في كل زمان
٩٦	يا باب الحوائج
٩٩	الأصول الخمسة
١٠٢	الحسن العسكري (عليه السلام)
١٠٥	الغريبة
١٠٧	الانتظار
١٠٩	عز علينا فراقك
١١١	المصيبة العظمى
١١٤	إخوان الشهادة
١١٦	مَن المعين؟
١١٩	زفاف المنايا
١٢١	اين الخدور
١٢٤	الشهيد الأول
١٢٧	أنصار الإمام (عليه السلام)
١٢٩	سوف نسبي
١٣١	الصابرة
١٣٤	لوعة الايام

١٣٧		الفراصة الحسنية
١٣٩		النعي، الأبوذية، الموال
١٤٠		النعي
١٤٢		الأبوذية في المباراة
١٤٥		ابوذيات متفرقة
١٤٦		الموال